

Wantok

Namba 2125 Jun 4 - 10, 2015 32 pes

Niuspepa Bilong Yumi Ol PNG Stret!

K1 tasol

INSAIT:



Gavana Kas laik rausim fon long skul - P3

Pot Mosbi Not Wes TVET skolasip lista - P9, 10, 23 na 24.

Meri tatu long PNG mas go het -P14



Isipla wei long promotim bisnis bilong yu

GUTPELA KWALITI, GUTPELA PRAIS LONG PNG

Bisnis Kads

K120 200 kads + takis Printin tasol
Wanpla sait, ful kala 300 gsm pepa.

K175 200 kads + takis wantaim disain wok

Only at... **THEODIST LTD**
THE STATIONERY SUPERMARKET
Waigani Drive, POM Markham Road, LAE
Ph: 313 9800 / 7232 1300 Ph: 472 5488 / 7091 7854
sales@theodist.com.pg saleslae@theodist.com.pg

KOLIM MIPLA NAO!

Gavman stopim Oposisen ...Long tebolim ripot

Stanley Nondol i raitim

GAVMAN bilong tude i yusim namba pawa na tupela taim long dispela wik long blokim Oposisen long tebolim ol ripot bilong pablik mani we oposisen i tok i lus long pasin korapsen.

Oposisen long las wik i laik tebolim ripot bilong K50 milien bilong Sepik Welpam projek na long dispela wik (aste), em i laik tebolim ripot bliong K50,000 long flua bilong Palamen. Tasol gavman i yusim namba bilong em na stopim Oposisen.

Long las wik, Oposisen lida, Don Polye, i tokim Palamen osem gavman i yusim K50 milien bilong Sepik Spesol Ikonmik Zon long rot i no bihainim lo, na askim Spika Theo Zurenuoc long tebolim long Palamen.

Planti ol memba bilong Palamen i no laikim Mista Polye long tebolim ripot na i mekim planti nois. Na Spika Zurenuoc i kamapim vot na gavman i win wantaim 61 na Oposisen 9.

Long aste tu, Deputi Oposisen lida Sam Basil i tok Opis bilong Paraim Minista long 2012 i baim K50, 000 i go long 3-pela man hailans long taim bilong politikel hevi long 2011/12 na i laik tebolim ripot o evidens, tasol gavman i gat namba na ol i singaut na stopim.

Mista Basil i tok K50, 000 i go aut long tripela man long ol i mekim tok giaman long sapotim gavman.

Em i tok long 2011 na 2012, em i bin stap wantaim gavman tasol em i no bin klia long dispela inap long dispela taim.

Praim Minista, Peter O'Neill, i tok i no gat wanpela hevi long dispela bikos kot i stretim



I NO WANBEL: Lida bilong Oposisen, Don Polye, wantaim deputi bilong em, Sam Basil, i tokaut long ol midia osem gavman i yusim pawa bilong em long tok no gat long ol taim ol laik tebolim sampela ripot.

pinis.

Em i tok em i no save long K50,000 peimen na i tok Sif Seketeri bai sekim na tokim Mista Basil bihain.

Mista Zurenuoc i tok bikpela namba bilong ol memba long Palamen i no laikim na tok no gat long Mista Basil long tebolim ripot.

Bihian long en, tupela lida, Basil na Polye i

givim ripot wantaim evidens bilong K50 milien bilong Sepik Welpam projek na K50,000 long ol midia.

I go moa long pes 2...

LINKING YOU TO MT HAGEN, TABUBIL & KIUNGA.*

Tuesday: Lae - Mt Hagen - Kiunga - Tabubil - POM
Thursday: POM - Tabubil - Kiunga - Mt Hagen - Lae

* New route commences June 06, 2015.

Call toll free on **180 5465** visit www.airniugini.com.pg or contact your nearest Travel Agent.



LinkPNG





POTO: Nupela Kumul Flaiova, Praitim Minista Peter O'Neill opim long Sande.

Siti Hol i stretim toktok bilong kos bilong Kumul Flaiova

SITI Menesa bilong Nesenel Kapitol Distrik Komisn (NCDC) Leslie Alu i toktok long ol bekim toktok bilong Oposisen Lida, Don Polye long rekot long ol trupela kos bilong flaiova.

Kontrak bilong konstraksen long Kookaburra Strit na Flaiova (nau Kumul Flaiova) i bin kisim mani long 26 Julai long 2013 olsem wanpela disain na kontrak long kos bilong K160, 368,474.

"Long olgeta konstraksen kontrak, kontrakta i save mekim kain kain kleim long kain kain as tingting. Tasol suprintenden i save luksave sapos kain ol kleim i wankain na em i save mekim disisen long en. Suprintenden deliget bilong mipela em indipenden Engineering firm Cardno," Mista Alu i tok.

Kontrak i larim senis tasol bilong go daun bilong pailing em ol i no bin klia long taim bilong kontrak. Mista Alu i tok long dispela ol i bin tok orait long olgeta longpela pailing bilong olgeta pia bai i 616 mita

na wanpela divisen bai i senis.

Trupela pailing dip bilong projek taim em i pinis em 669.9 mita we i 53.9 mita antap moa long dip bilong kontrak ol i wanbel long en. Long dispela, supritenden deliget i tok orait long senis bilong putim moa dip bilong pailing long 53.9 mita long kos bilong K749, 456, na apim kos bilong pinis i go antap long K161, 117, 930. Dispela em bilong Klaus o hap 10 bilong ol Spesol Kondisen bilong kontrak.

"Mi tok klia olsem pinis kos bilong Kookaburra Strit em K161, 117, 930. Dispela em bilong konstraksen bilong 4-pela len rot long Sir John Guise Draiv i go long Airpot raunabaut (2.2kilo mita) na 4-pela len faliova long 600 mita, tupela ol len rot aninit long flaiova long tupela sait (1.5 kilo mita), ol hap bilong wokabaut, ol dren aninit long graun, ol pos bilong PNG Pawa na nupela hap bilong wara paip, na ol disain bilong olgeta wok antap," Mista Alu i tok.

Oposisen salensim K160m Kumul Flaiova ...Senisim nem

Stanley Nondol i raitim

OPOSISEN lida Don Polye i salensim K161milien Kumul Flaiova we Praitim Minista Peter O'Neill i opim long Sande, na i tok gavman i westim bikipela mani bilong pablik taim planti ol rot na bris long ol bikipela haiwe long kantri i bagarap na i nidim helpim bilong gavman.

Taim Mista O'Neill i opim 600 mita Kumul Flaiova, em i tok dispela em i wanpela bilong bikipela developmen gavman i mekim long planti provins insait long kantri. Em i tok planti taim Mosbi em siti bilong PNG na em i ai bilong wol.

Mista O'Neill i tok sampela lain i save les long lukim kain

divelopen na i wok long mekim ol toktok i no gutpela. Dispela em bikipela divelopen long Pasifik na PNG i get nem long wol mep.

Praitim Minista O'Neill i kamap moden PNG wantaim wanpela Flaiova bris we bikipela pablik mani i go daun long baret.

NCD gavana Powes Parkop long taim bilong opim Kumul Flaiova i tok Mosbi em I kapitel siti na em i getwe long PNG long ai bilong wol, na tem I tok tenkyu long O'Neill Dion gavman long putim K161 milien long 600

Em i tok Kumul i makim kantri. Don Polye em i sivil enjinia i tok em i gat olgeta dokumen o pepa na i soim olsem kos bilong Kumul Flaiova em moa long K200 milien na i no K160 milien olsem gavman i tok.

Em i tok K200 milien o K161 milien em I bikipela mani we gavman inap long putim ol dispela mani long ol bikipela haiwe olsem Magi, Hiritano, Hailans, Sepik na Buluminski we we bagarap

no gut tru, na planti ol trenspot kampani na pablik na PMV i kisim taim.

Em i tok planti ol bikipela bris long Lae-Madang Haiwe na ol planti ol bris long provins i bagarap na gavman inap long opim ai na stretim dispela.

Mista Polye i salensim Praitim Minista O'Neill long tok klia long wanem rot PNG i kamap moden PNG wantaim wanpela Flaiova bris we bikipela pablik mani i go daun long baret.

NCD gavana Powes Parkop long taim bilong opim Kumul Flaiova i tok Mosbi em I kapitel siti na em i getwe long PNG long ai bilong wol, na tem I tok tenkyu long O'Neill Dion gavman long putim K161 milien long 600

mita bris long joinim Palamen haus na Jackson ples balus.

Long wankain taim, menba bilong Mosbi Not Is Labi Amaiu i mekim wankain tok na singaut long ol pablik husat gat ka long no ken spetim buai na tromai ol pipai long dispea nupela rot.

Em i tokim ol pipel I mas i gat amamas long bikipela divelopen na lukautim.

Menesmen bilong Nu Silan kampani Jawkins husait i wokim dispela Faliova i tok tenkyu long gavman, NCDC, ol sab kontrakta, PNG Pawa, Eda Ranu na ol komyuniti long olgeta gutpela sapot bilong ol long taim bilong konstraksen insait long tupela yia.

Kranket Ailan i no kisim pawa

Mathew Yakai i raitim

OL papa graun long Krangkhet Ailan long Madang provins i no kisim pawa, stat long mun Mas, taim ol lain long narapela provins i kam kisim ples bilong ol long Madang Risot na i slip long lait.

Wod 1 kaunsela aninit long Ambenob Lokol Level Gavman, John Guluman, i givm kot oda long Madang Brens PNG Pawa Limited long Me 21 na i laikim ol long putim pawa pastaim, bihain long em bai bungim mun Jun, long wanem em I kamapim hevi long laip bilong ol pipel. Dispela hevi long pawa i kamapim hevi tu long Krangkhet Ailan Praitimeri, Luteran Siping Kompaun, Kranket Los, Kilingoi Los, nait lotu na ol narapela samting moa.

"Pawa em i laip bilong 3000 na moa pipel husat i slip insait long Wod 1 kaunsel eria bilong mi, na mi laikim PNG Pawa long putim pawa hariap, long wanem mi bai kisim narapela rotmoa wantaim PNG Pawa sapos em i no putim hariap," Gu-

luman i tok.

Bod Siaman bilong Krangkhet Ailan Praitimeri Skul, Jack Kila, i wari tru, long wanem 11-pela tisa bilong GAPS i no wok gut na ol narapela samting bilong skul i no stap sef long nait.

"Ol kompyuta na printa i no wok na ol tisa i bungim taim no gut long redim tes na ol narapela skul wok," Kila i tok.

Skul i gat 400 na moa sumatin long elementri prep i go antap long gret 8 na Kila i wari tru, long wanem pawa i bagarapim stadi bilong ol.

Foma Lo na Oda Siaman long ailan na komyuniti lida na tu papa bilong Kilingoi Los, Mista Koi, i laikim PNG Pawa long putim pawa hariap, long wanem, pawa i bagrapim sindaun bilong ol manmeri husat i save rent na slip long los bilong em na bisnis bilong em i stap klostu long bungim taim no gut.

Mista Koi i tok, "liklik bisnis man olsem mi i rejistarim kampani na peim pawa long wokim bisnis, tasol dispela kain samting i kamap na em i bagarapim driman bilong mi."

Gavman stopim Oposisen...

Long K50 milien, Minista husat i go pas long projek em Minista bilong Tred Komes na Indastri, Richard Maru, i tok ol tok sut bilong Oposisen i no tru.

Em i tok Seketeri bilong Fainens, Ken Nangan na Seketeri bilong Komes na

Indastri, John Andrias tasol i sainim sek na i no gat paul pasin i kamap.

Minista Maru i mekim tok klia olsem K24 milien i go long ol infrastraksa projek olsem wara saplai, pawa saplai, polis stesen, rot na ol arapela, na K26milien i

stap yet long tras akaun.

Ripot i kam long midia long kantri i soim olsem opis bilong Praitim Minista long Me 23, 2012 i baim K50,000 i go long wanpela kampani.

Ripot i soim olsem kampani (mipela i holim bek

I kam long pes 1

nem) i kisim peimen long intelijen edvais sevis i go long opis bilong parim minista.

Tasol em i soim tu olsem kampani i kisim K50,000 sek pastaim long Me 23 na rejista bihain long IPA long Me 29, 2012.

Talk more for just K1 a day

Subscribe to our K7 weekly pass. Dial *123*7#.

Contact us now!
 Customer Care 76003555
 support@bmobile.com.pg

www.bmobile.com.pg

Get 7 days
UNLIMITED FREE CALLING
Between Bmobile-Vodafone numbers

20 MB
Internet data

10 MIN
Calls to any network in PNG

20 SMS
Text to any network in PNG



Kas tok no gat long mobail fon long olgeta Madang skul

James G. Kila i raitim

GAVANA bilong Madang, Jim Kas i givim strongpela toktok i go long Madang provinsal edukesen bod long hariap na kamap wantaim tupela polisi sabmisen na givim em long kamapim lo long stopim ol sumatin long olgeta skul long provins i no ken yusim mobail fon na tu, stopim hevi bilong pait namel long ol skul .

Gavana Kas i tokaut long dispela las wik bihain long ol tripela bikpela hevi i kamap insait long tripela hai skul insait long Madang provins we ol sumatin i kamapim.

Ol dispela bikpela hevi long tripela hai skul long Madang i no gutpela stret, na Gavana Kas i tok pasin ol sumatin i wokim i soim olsem sampela bilong ol i no laikim skul, tasol ol i go nating long kamapim hevi na bagarapim ol arapela gutpela sumatin husat i laik lainim samting.

Long namba wan hevi em ol sumatin bilong Aiome hai skul i kukim daun klasrum, domitori na bihain long pait i kamap namel long ol sumatin bilong Simbai na Midel Ramu.

Narapela skul hevi i bin kamap long Trans-Gogol hais skul we i lukim ol sumatin i kros na raunim ol tisa, na long las tupela wik narapela hevi i kamap long Holi Spirit hai skul long Bogia, i kamap namel long ol sumatin bilong Manam ailan na ol bik ples we ol i kukim wanpela domitori tasol bilong skul na kamapim birua long ol tisa bilong skul na ol famili bilong ol.

Mista Kas i tok strong olsem Madang PEB i mas

redim dispela tupela polisi sabmisen hariap. Tupela sabmisen em long kamapim strongpela lo we bai i tambu long ol sumatin long yusim mobail fon insait long skul eria, na narapela long kamapim lo bilong stopim ol skul pait long namel long ol grup bilong wanem ol distrik o eria.

Gavana i kros stret na tokim ol nius lain olsem pasin nau ol sumatin long Madang provins nau i go no gut tru, na i soim olsem ol sumatin nau i wok long kontrolim skul na ol tisa.

“Ol sumatin long ol skul insait long Madang nau i mekim laip bilong ol tisa i no seif moa,” Mista Kas i tok.

Em i tok pasin bilong kukim ol klasrum na domitori em nogut tru, na i soim olsem ol sumatin i no tingting long go lainim samting. Ol i go westim taim nating na kamapim hevi namel long ol yet na bagarapim ol bikpela samting we i kos bikpela mani tru.

Gavana Kas i no amamas long pasin i kamap long ol hai skul insait long Madang provins, we em i tok provinsal gavman i putim mani na invesmen long wokim ol klasrum na domitori long Aiome haiskul long kisim ol nupela gret 9 sumatin i go insait, tasol liklik lain sumatin i bagarapim stret ol dispela samting.

Mista Kas i tok long luksave bilong Madang provinsal gavman, em Aiome Angliken hai skul em i pas olgeta. Polis i go pinis long dispela hap long holim pasim ol lain i kamapim hevi long skul.

Gavana i mekim bikpela



Gavana Jim Kas i givim strongpela toktok

POMCCI i sapatim PC

POT MOSBI Semba bilong Komes na Industri (POMCCI) i laikim rot we nupela Polis Komisina (PC), Gari Baki i kamapim long senisim Polis Fos.

Em bai nidim bikpela sapat wantaim gavman na bisnis komyuniti na em bai wokim wok.

“Mipela ol pipel bilong kantri i ken tok olsem bikpela dua i op long planti senis bai kamap long lata bilong polis fos, tasol long tingting bilong gavman i no laikim dispela we i ken kamap, na mipela bai bihainim tasol,” toktok i kam long POMCCI.

POMCCI i tok moa olsem, ol Komisina i mas stap planti taim long opis na i kisim inap ekspiens long gavman i ken luksave na tok orait long ol i karim aut senis insait long polis fos.

Komisina i toktok long senisim yunifom em i gutpela tingting, tasol mipela i ting olsem olgeta opisa mas i gat nem antap long bes na mipela i ken lukim gut. Mipela bai no inap gat dispela hevi i bin kamap long Hanuabada sapos ol opisa i gat nem antap long bes bilong ol.

“Mipela i save pinis olsem planti sekyuriti bai stap long dispela Pasifik Gem, na mipela i no laikim ol opisa long blokim rot nating na askim mani long ol lain long spot fain long ol sait bilong rot, long wanem em i no strepela we aninit long Lo bilong PNG,” mausman i tok.

“Ol opisa i mas wokim rot blok taim ol bikpela komand i tok orait long ol, na ol i ken wok aninit long taim sampela senia opisa i mas lukluk i stap.”

REGISTER ACTIVATE TICKETS!



Download and Activate the BSP Mobile Banking App for your chance to share in the 2015 Pacific Games Ticket Giveaway!




20x Family Packs
(4x tickets)
General Admission.

1x Family Pack
(4x tickets)
Major Giveaway for Sport or Venue Package.

* Only successful Mobile Banking App activation will be eligible.

1. Register for Mobile Banking
2. Download App
3. Activate **NOW**

DOWNLOAD NOW



320 1212 / 7030 1212 - 24/7

servicebsp@bsp.com.pg

www.bsp.com.pg




Palamen stopim K50m ripot

Stanley Nondol i raitim

GAVMAN i yusim namba pawa na stopim Oposisen long tebolim K50m ripot bilong Sepik ikonomi Zon projek long Palamen.

Oposisen lida Don Polye taim Palamen i sindaun long las wik i askim Praim Minista O'Neill long tok klia long rot gavman i yusim K50 milien gavman i putim bilong Welpam Projek long Is Sepik Veli.

Mista Polye i tok em i kisim ripot olsem K50 milien i no go long stretpela rot bilong kirapim projek na ol lida long gavman i yusim sampela mani na em i askim Spika, Theo Zurenuoc, long



tebolim ripot.

Tasol Mista Zurenuoc i tok Oposisen i ken tebolim ripot bihain long minista i go pas long projek, Richard Maru i

givim ripot long sait bilong em.

Spika i mekim dispela tok tok bihain long Mista O'Neill i tok Minista bilong Tred Komes na indastri, Richard Maru, bai bekim askim bilong Polye.

Na long Fonde las wik, Mista Polye i askim gen Spika Zurenuoc long tebolim ripot, tasol Spika i no larim bihain long Minista bilong Envairomen, John Pundari, i askim Spika long ol memba i no ken tebolim ol ripot we bai bagarapim nem bilong Palamen.

Kopi bilong ripot i go long midia i soim olsem Nesenel Plening dipatmen i salim K50

milien i go long tras akaunt nem- Special Economic Zone Sepik Plain Trust Account.

Minista Maru i tokim Palmen Seketeri bilong Fainens, Dokta Ken Nangan, na Seketeri bilong Tred Komes na Indastri, John Andrias i gat signesa long akaun, na K50 milien i no lus long pasin korapsen.

Bihain long dispela, Palamen i vot na gavman i gat namba na i win wantaim 61 vot.

Ol 9-pela memba husat i laikim Polye bai tebolim.

Gavana bilong Nu Ailain, Sir Julius Chan, i votim i go long sait bilong Oposisen.

Minista Maru i givim tok klia

long Palamen long rot gavman i yusim K50 milien kina olsem gavman i putim mani bilong stretim ol infrastraksa long pulim ol bikpela malti bilien investa long ovasis i kam long divelopim Sepik plein long mekim Welpam projek.

Minista Maru i tok planti ol infrastraksa divelopmen olsem pawa saplai, wara saplai na pois stesen, rot na ol arapela infrastraksa i kamap long K24 milien na K26 milien stap yet long Tras Akaun bilong projek.

Em i tok moa olsem ol infrastraksa bilong pulim divelopa bai pinis long a 2015 na Welpam projek bai kirap.

Bikpela haus kalabus bai kamap long Manus

PRAIM Minista Peter O'Neill i tok gavman i lukluk long toktok bilong em long putim wanpela bikpela haus kalabus long Manus provins.

Mista O'Neill i tok gavman i tokaut pinis long las yia olsem wanpela bikpela haus kalabus bai kamap long Manus long putim ol biknem kriminel.

Em i tok gavman i no putim mani long kirapim dispela projek tasol dispela em i no bikpela hevi na gavman i lukluk long kirapim dispela haus kalabus.

Mista O'Neill i mekim dispela toktok long Palamen bihain long memba bilong Manus, Ronney Knight, i askim Praim Minista long tok klia sapos haus kalabus bai kamap long Manus olsem gavman i bin tokaut long en las yia.

Mista Knight i tok ol pipel bilong Manus i bin amamas taim gavman long las yia i tokaut long wokim wanpela bikpela haus kalabus long Manus tasol i no gat toktok moa i kamap na ol pipel i wet yet na laikim ansa long gavman.

Mista O'Neill i tok em bai toktok wantaim komisina bilong Koreksenel Sevis (CS) long ol wok bilong kamapim dispela projek na bai tok save long pipel bilong Manus long liklik taim bihain.

Porgera papagraun bai kisim K2m MoA mani

OL papagraun long bikpela gol main, Porgera bai kisim K2 milien aninit long MoA bihain long longpela taim bilong wet.

Minista bilong Maining Byron Chan i tok Minerel Risos Atoriti (MRA) i redi long baim ol papagraun K2 milien tasol dispela mani bai go long helt program, o haus sik long Porgera.

Mista Chan i tokim Palamen long benkim bilong askim bilong memba bilong Porgera Laiagap, Nixon Mangape.

Mista Mangape i askim Minista Chan long tok klia wanem taim stret ol papagraun bai kisim MoA mani bikos divelopa Barrick Limited i salim Porgera maining i go long wanpela kompani bilong kantri Saina na Porgera Join Vensa (PJV) bai pas long neks wik..

Mista Mangape i tok husat tru bai go pas long baim ol papagraun, na wanem taim bai ol i kisim MoA mani.

Mista Chan i tok Nesenel Plening i givim K2 milien pinis na ol papagraun bai kisim.

Palamen i tok pait long buai tambu

Stanley Nondol i raitim

OL MEMBA bilong Sentrel provins i autim belwari na tokpait long Palamen na singaut long nesanel gavman long lukluk long hevi bilong buai tambu long Mosbi.

Ol i laikim bai rot bilong maket i op long ol Sentral pipel i ken salim buai long mekim mani na sapotim laip bilong ol.

Memba bilong Abau, Puka Temu, Kairuku Hiri em Peter isoaimo, Rigo memba Ano Pala na wantaim Gavana Kila Haoda i mekim strongpela toktok long Palamen olsem ol polis na NCDC wok man i wok

long mekim ol pasin i no gutpela long ol pipel bilong Sentrel taim ol i sekim ol kar, moto bot na ol pipel i kam long Mosbi.

Ol i toktok strong olsem gavman i kisim Mosbi siti na ol i go long ples na buai em i wanpela bikpela rot bilong mekim mani, tasol nau ol pipel i kisim taim bikos NCDC Gavana, Powes Pakop, i stopim ol long klinim Mosbi siti long soim ol ausait lain olsem PNG i gat gutpela siti.

Dispela tok pait i kamap long Palamen long taim bilong dibet bilong autim belwari taim memba bilong Abau, Puka Temu i tok ol woklain bilong NCDC i bin

sekim kar bilong em na kolim em spakman.

Mista Temu i tok ol lain husat i putim rot blok long boda bilong Mosbi na Sentrel i salim buai long eria bihain long ol rausim long ol pipel bilong Sentrel.

Dokta Temu i tok em olsem papagraun bilong Sentrel i no wanbel long ol kain pasin i kamap we ol polis na NDCD i rausim buai long ol papagraun na ol i salim long mekim mani.

Dokta Temu long Palamen i singaut long gavman long lukluk bek long lo bilong NCDC na givim bek long Mosbi siti i go bek long Sentral provins.

Gavana Kila Haoda i

mekim wankain toktok na em i laikim gavman i givim bek Mosbi siti i go long ol Sentral papagraun, na i tok NCDC i no toktok wantaim Sentral Provins Gavman taim em i kamap lo, na planti pipel bilong em i kisim taim long buai tambu NCDC i putim.

Memba bilong Kairuku, Peter isoaimo i tok em i no wanbel long niuspea ripot olsem buai long mani mak bilong K500,000 em ol polis i kisim long ol Sentrel papagraun na kapsaitim long solwara.

Mista Isoaimo i tok inap em inap, na em i singaut long nesanel gavman long putim tambu long ol polis i

no ken go insait long ol viles bilong Sentrel olsem Porebada, Hanuabada, Lealea na ol arapela viles na sekim ol kar na pablik na rausim buai.

Em i tok planti taim ol polis i go insait long viles na em olsem lida i les pinis.

Mista Ano Pala i tok strong olsem buai em kalsa bilong ol pipel na i no gat asua. Asua i kamap long siti taim ol pipel bilong arapela provins i kaikai na spetim nabaut long siti.

Olgeta memba i laikim nesanel gavman long rausim buai tambu na larim ol pipel bilong Sentrel i salim buai bihain long taim Pasifik Gems i pinis.

Helt sekta i stap yet long Helt Atoriti na i no DDA

HELT sekta insait long kantri stap aninit long Helt Atoriti na i no kam aninit long Distrik Divelopmen Atoriti we distrik ediministreta em Sif Eksektiv Opisa bilong Distrik.

Minista bilong Pablik Sevan Dokta Puka Temu i tokim Palamen olsem Palamen i no sensim lo bilong

Helt Ekt long givim pawa long Distrik Edministreta bai bosim helt sekta long distrik yet na nau em Helt sekta stap aninit long Provinsal Helt Atoriti.

Dokta temu i tok Provinsal Helt Atoriti na Distrik Edministreta i mas toktok na skelim ol wok long lukautim ol helt program na ol helt woka

long distrik na provins.

Mista Temu i mekim dispela tok klia bihain long taim memba bilong Nuku, Joe Sungi, i askim long Mista Temu long tok klia bikos gavman i givim pawa long distrik edministreta aninit long nupela DDA Ekt na olsem wanem long Helt Atoriti i stap pinis long planti provins.



WELKAM: Ol pikinini bilong Tubowada long Kiriwina Ailan, Milen Be i welkamim Oil Search Pasifik Gems Rilei Baton taim em i raun i go long provins na ailan long dispela wik. *Poto: MadNESS Photography*

Noken lus ting ting long baim Wantok Niuspepa bilong yu Tude!!!





PIH Saveman Nias

"I kam long Pacific International Hospital Port Moresby"

Ph: 311 3000/ Ph: 323 4400 Textline 7155 8866 Website: www.pih.com.pg

KISIM SEKAP, LUKSAVE NA SEVIM KITNI BILONG YU

SAPOS yu bin wok long bihainim stori bilong sik **Daiabitis** long niuspepa, bai yu kisim save olsem dispela sik i save kamapim rot bilong ol narapela sik i kamap long ol narapela hap bilong bodi olsem lewa na ai.

Long dispela wik, Pasifik Intenesenel Haus sik speselis dokta i givim gen sampela moa tok save long sik Daiabitis Melitus na long save olsem em i ken bagarapim ol Kitni.

Daiabitis Melitus em i namba wan tru long kamapim bagarap long kitni. Em i no gat we bai dispela sik i pinis long bodi sapos yu kisim, tasol ol marasin i stap long helpim sik long em i no ken go bikpela na bagarapim kitni hariap.

I gat sampela rot i stap olsem long yu ken kisim marasin, o putim giaman kitni long bekim dispela kitni we i bagarap pinis na long rausim ol bikpela wara i stap insait long blut na tu long kisim kitni bilong narapela man na putim long bekim dispela we i bagarap pinis.

Bikpela wok bilong kitni long bodi em long rausim ol pipia insait long blut bilong man na kamapim nupela blut i go bek long bodi.

Taim wanpela kitni i bagarap em bai i no inap long rausim ol pipia o doti long blut na tu em bai i no inap long kamapim nupela, klinpela blut na ol sol we bodi i nidim.

Daiabitis Melitus em i save kamap taim i gat bikpela suga tumas long blut longpela taim na dispela i ken bagarapim planti ol liklik hap bilong blut insait long bodi we i save kamapim kitni na go longpela taim nau em i save bagarapim kitni.

Samting olsem 20 o 30 pesen bilong ol pipel husat i gat Daiabitis i save kisim sik long kitni (Daiabiti Nepropati), tasol i no olgeta yet i save go bikpela inap long bagarapim kitni.

Wanpela man o meri husat i gat daiabitis inap tru long kisim Nepropati, maski ol i kisim insulin, marasin we i save daunim glukos o suga, bilong wanem hevi i save kamap taim man o meri i stap wantaim sik daiabitis longpela taim pinis.

Narapela nem bilong dispela kain sik em Daiabitik Glomerulosclerosis. I no gat samting inap long pinisim sik, Daiabiti Nepropati na man o meri bai em i kisim marasin long laip taim bilong em.

Ol pipel i kisim daiabitis i ken kisim ol narapela kain sik bilong kitni tu, em wantaim ol sik bilong rop bilong bluti i go long kitni i go liklik tumas, we ol i kolim long Renal Artery Stenosis o Renovascular sik.

Tok klia bilong kitni



Bodi bilong man i gat tupela kitni, wanpela long wan wan sait bilong bun baksait na em i stap long daunbilo long ol sait bun.

Insait long wan wan kitni i gat milien liklik ol hap bilong blut ol i kolim long Nephron.

Wan wan nephron i gat liklik samting bilong klinim blut, nem bilong em, glomerulus i pas wantaim liklik tiub (tubule).

Ol dispela filta o hap bodi bilong klinim blut i save klinim blut na salim i go insait long ol tiub.

Planti wara i save go bek long blut insait long ol tubule na ol pipia i save kamap olsem pispis.

Pispis i save bung long ol tubule wantaim wanpela hap bodi i luk olsem fanel (renal pelvis); long hap em pispis i save ran i go long wanpela tiub, (ureter) we i save bungim wan wan kitni wantaim blede o bek bilong pispis.

Pispis i save lusim bek bilong pispis bihainim i go aut long urethra, em i bun kain tiub we i save go aut long bodi bilong man.

Ol kitni we daiabitik nephropathy i kisim em i no moa save mekim gut wok bilong em na em i save soim planti protin i kamap long pispis (microalbuminuria).

Ol wara na sol we i stap long bodi i save kamapim sik we i pasim pispis na hariap tasol blut presia i save go antap.

Daiabitis na Kitni

Em i klia olsem daiabitis i ken kamapim sik long kitni, tasol bilong wanem na bikpela suga long blut bai bagarapim (glomeruli), em yumi no save yet.

Sik bilong blut presia i go antap tumas (hypertension) em i save kamap olsem rot bilong bagarap long kitni na ol pipel husat i gat daiabitis i ken kisim hai blut presia o hypertension.

Renin-angiotensin sistem we i save helpim long blut i ran gut, i save helpim tu long kamapim sik daiabitik nephropathy.

Ol narapela hevi we i ken kamap em long smuk sigaret na sapos ol famili lain i gat sik bilong daiabitis.

Daiabitik Nephropathy i save kamap isi, isi tasol kisim marasin em i ken helpim long daunim bagarap i no ken kamap hariap tumas.

Ol sain bilong Kitni i no wok moa

Ol pipel husat i gat daiabitis, bai i ken luksave long hevi bilong kitni taim ol i wokim sekap.

Wan wan taim, wanpela man o meri i ken kisim Kain 2 bilong Daiabitis na i no save, sapos ol i no sekim mak bilong suga long bodi, na em i ken isi, isi long bagarapim kitni bilong ol.

Long namba wan taim, wanpela sain tasol yu ken lukim em long bikpela protin long pispis tasol i no gat narapela sain moa.

Tasol em bai kisim sampela yia bihain nau bai kitni i kisim bagarap inap long kamapim ol narapela sain olsem:

- planti wara long bodi na i mekim hap bodi long pes o lek i solap,
- bodi i skin les nating,
- het i pen, pilim bel i tanim na i laik traat na traat.

Ol rot bilong sekim

Daiabitik nephropathy em ol i ken sekim wantaim sampela tes olse:

Sekim pispis - bilong lukim mak bilong protin, sapos mak bilong protin i go antap tumas long pispis em wanpela namba wan sain bilong diabetic nephropathy.

Blut presia - Em i gutpela long sekim blut klostu, klostu sapos blut presia i go antap. Taim blut presia i go antap em i save kamapim daiabitik nephropathy na i save helpim long sik bilong kitni i go bikpela.

Trestim blut - bilong sekim wok mak bilong kitni.

Baiopsi - ol i rausim wanpela liklik hap bilong kitni wantaim wanpela liklik nidel na ol i sekim insait long leboratori. Dispela bai ol i wokim sapos ol i tingting planti long kitni i bagarap i kamap long daiabitis o long narapela samting i kamapim.



Kitni Altasaun - em i save mekim sais bilong ol kitni i kamap bikpela long piksa na ol i ken sekim ol rop bilong blut o arteri i go long kitni i no ken go liklik tumas na bai mekim kitni bai i no wok.

Kain kain tritmen


I no gat marasin bai mekim orait daiabitik nephropathy. Tritmen i mas go strong moa taim bagarap long kitni i go bikpela moa klostu long em i pinis olgeta.

Bilong stretim ol i ken mekim ol dispela samting: **Stopim** - em i gutpela tru long stretim na em bai i ken bosim gut mak bilong suga na blut presia.

Kisim Marasin - kisim marasin bilong daunim blut presia, olsem long angiotensin converting enzyme (ACE) inhibitors na angiotensin receptor blockers long daunim liklik bagarap long kitni.



Dialysis - stretim wantaim giaman kitni. Taim kitni i stop olgeta long wok em ol i ken mekim dispela. Hemodialysis em i bikpela we long helpim kitni we i kisim bikpela bagarap. Dispela we i ken helpim long sikman i ken stap laip maski ol kitni i no wok gut. Dialysis em long taim ol dokta i save pusim blut bilong sikman o meri wantaim wanpela spesel masin (haemodialysis) na i save helpim long rausim ol pipia long blut na holim bek ol wara na sol, o i save rausim ol pipia long ol wara we i save go insait long as bilong bel (abdomen) ol i kolim long (peritoneal dialysis). Dialysis bai i mas



kamap planti taim insait long wik inap long laip taim bilong sikman o meri.

Kitni transplant - ol i kisim wanpela gutpela kitni long narapela man i dai pinis o wanpela famili lain i givim o long wanpela pren na bekim dispela kitni we i bagarap pinis.

Ol rot bilong daunim bagarap

Wanpela man o meri husat i gat sik daiabitis i ken pasim rot bilong daiabitik nephropathy, i ken stopim em long kamap, long planti kain we olsem:

- Strong long daunim mak bilong suga long bodi wantaim ekasesais na kaikai.
- Lukautim gut presia bilong blut i no ken go antap
- No ken kisim sampela kain ol marasin bilong daunim pen na skin hat marasin - yu olgeta taim mas lukim dokta long kisim moa tok save sapos yu gat daiabitis long bodi.
- Sapos i gat hevi long rot bilong pispis yu mas sekim na kisim marasin hariap.
- Dring planti ol wara na dring i no gat alcohol o bia.
- No ken kisim ol marasin we bai givim hevi long kitni olsem ol x-rei we bai nidim sut i gat dai o pen long en
- Sekim ol kitna long ol i mas stap gut.

Ol samting bilong tingim

- Wanpela rot bilong kitni kisim bagarap em daiabiteis mellitus, em sik i save kamap long bikpela suga tumas i stap long blut.
- Sapos i stap longpela taim ol bikpela suga long blut i save bagarapim ol milien liklik hap bilong blut insait long wanwan kitni.
- Em i no gat marasin bilong stopim dispela sik, na bai kisim moa marasin klostu, klostu taim bagarap long kitni i go bikpela moa.
- Bilong daunim hevi bilong sik long kitni i gat marasin, dialysis na senisim kitni wantaim narapela long narapela man em i stap.

Sapos painim aut hariap long daiabitis na sapos yu bosim yu yet long hamas suga yu kisim na tu long sekap long dokta klostu, klostu, em bai ken sevim ol kitni bilong yu na daunim hevi bilong Daiabitis.

Gutpela na kliapele we bilong helpim nau i stap long PNG long helpim yu long save hariap long daiabitis na sik long kitni.

Dokta Mondia bilong PIH em i save moa long ol marasin bilong bodi na em i speselis dokta bilong kitni, na wantaim menesmen bilong em, PIH i gat wanpela nambawan dialysis suit we i save helpim ol pipel long stap gutpela laip, maskim kitni bilong ol i wok long bagarap.

Poto:

- 1 Ok kitni
- 2 Altrasaun sekap
- 3 Dialysis

- Antenatal package
- Labour & delivery package
- Laparoscopic 'keyhole' surgery
- Well woman and baby clinic
- Neonatal intensive care

Get ready to deliver your next baby at the luxurious labor & delivery suite at the new PIH !



3Mile Hill, Taurama Rd, Port Moresby * Call 311-3000 or 323-4400 or text 7155-8866 or email: pihopd@gmail.com

PC bai senisim konstabuleri

Philemon Tame i raitim

POLIS Komisina Gari Baki i senisim wei bilong sindaun insait long opis long nesenel polis hetkwata long Konedobu.

Baki i tok, long las 40 yia, sindaun bilong opis i no senis, tasol mi senisim dispela i go long gutpela wei, taim mi kisim opis long las wik.

“Namba bilong ol pipel i gro bikpela pinis. Long 1975 populesen bilong PNG i stap olsem 2-milien na long 2015 i gro kam antap long 8-milien na moa. Tasol namba bilong polis man na meri i stap olsem 4,500 long taim bilong independens na 6,000 long dispela yia i soim olsem polis fos i nidim planti moa polis,” Komisina Baki i tok.

Em i tok moa olsem ol pipel i lusim asples na kam insait long ol taun na siti, na populesen long ol bikpela senta i wok long kam antap olgeta taim. Dispela i stiaim em long senisim straksa bilong konstabuleri long kamap wantaim ol wanem kain senis gavman i laikim



Polis Komisina Gari Baki i tok long senisim konstabuleri taim namba bilong pipel i gro bikpela.

long en.

“Mi bai putim moa komand na hailans rijon bai gat tupela komand. Wanpela long Westen Hailans, Jiwaka, Isten Hailans na Simbu bai kam aninit long Isten Rijonal Komand. Westen Rijonal Komand bai

lukautim Hela, Sauten Hailans na Enga provins,” Komanda Baki i tok.

Long wankain taim, Momase Risen bai gat tupela komand tu. Boda Komand bai lukautim Westen, Is Sepik na Wes Sepik provins, na Morobe na

Madang bai kam aninit long Metropolitan Komand.

Em i tok, Sentral provins bai kamaut long NCD-Sentral komand na em bai joinim Sauten Komand.

“Mi bai putim NCD i go long tripela grup olsem ol elektoret i stap long en,”

Komisina Baki i tok.

“Mi bai mekim tripela bikpela polis stesen bai stap wan wan long Mosbi Not-Is, Mosbi Saut na Mosbi Not-Wes long wanem, NCD em Papua Niugini we olgeta pipel i bung.”

Ol Skaut i bung long PNG

NAMBA 8 bung bilong ol Kansil bilong Saut Pasifik Skaut Asosiesen (CSPSA) i kamap long Lamana Hotel long Tunde, 26 Me na em i makim namba wan taim bung long Papua Niugini.

Gavana Jeneral, Gren Sif Sir Michael Ogio, i tok ol skaut i gat wanpela bikpela wok we i save laikim ol yangpela long kamap gutpela lain manmeri long bihain taim long karim kantri i go gut.

Sir Michael i tok ol skaut i wanpela bikpela yut muvmen i stap pinis insait long olgeta hap lon wol na i helpim planti yanpela pipel i kamap lida long bihain taim.

“Mi gat bikpela strong long mekim dispela toktok, long wanem mi tu i kamap memba long skaut muvmen na kamap wanem kain man tude mi stap,” Ogio i tok.

Long dispela as tasol, ol pipel i mas wok bung long strongim dispela ogonaisen i ken gro bikpela insait long komyuniti, sosaiti na insait long kantri.

“Mi gat bikpela amamas, long wanem, taim yumi i kamapim dispela asosiesen na 90 yia i go pinis, na yumi i bungim sampela hevi tu tasol, em i gro bikpela pinis long ol 22 provins insait long kantri,” Sir Michael i tok.

Em i tok moa olsem polisi pepa i stap pinis long rivium Skaut Asosiesen bilong PNG Ekt, na tu ol i tok orait long skaut muvmen i ken kam insait long nesenel edekesen karikulum na fanding alokesen long nesenel baset, na em i namba wan samting insait long stori bilong muvmen.

Long ol ples insait long Pasifik, skaut muvmen i kamap bikpela pinis.

Skaut muvmen i stap pinis long kamapim ol save man insait long kantri.

Disaplin i mas stap long Polis Fos

Philemon Tame i raitim

POLIS Fos (PF) i mas gat gutpela disaplin o bihainim stretpela pasin olgeta taim.

Long dispela wik Mande, Polis Komisina, Gari Baki, i tokaut klia insait long bung wantaim ol nius ripota long polis het kota long Konedobu olsem, em bai no inap larim ol wok man na meri bilong PF wok aninit long rot we PF i no save laikim.

Mista Baki i tok, taim em i stap komisina, em bai wok

strong long bihainim ol stretpela pasin we PF Ekt i putim.

Olgeta ol opisa, komanda na supavaisa we polis komisin i makim pinis, em ol i mas wok wantaim gutpela lidasip bilong ol long soim gupela piksa long ol polis man na meri husat i wok aninit long ol, na ol i ken lukim na bihainim.

Baki i tok olsem PF i no gat sampela no gut polis man na meri tasol, ol komanda i no save givim gutpela stia long ol.

Long ol pasin ino stret, Komanda Baki i tok, ol memba bilong PF i mas bihainim gut disaplin. Long dispela rot tasol, ol polis man na meri bai kamap strongpela na ol bai gat moa pawa long wok bilong ol.

Baki i tok, em bai no inap larim ol husat polis man o meri i laik pilaim korap na les pasin insait long wok, long wanem planti pipel i painim wok. Na long kamap polis, em bai no inap nidim

ol man husat gat bikpela skol.

Baki i tok, “mi mekim dispela toktok long ol polis i ken senisim pasin no gut.”

Ol polis opisa bai no inap kisim trensefoda. Mi gat olgeta pawa long wokim disisen, na long wanem polis stesen mi bai put ol opisa em i laspela toktok na ol bai tok orait tasol.

Baki i tok moa olsem, em i tok orait long ol polis i ken werim Namba Wan Yunipom. “Mi givim wanpela

mun tasol long ol namba wan polis senta olsem Mosbi, Lae, Hagen na Kokopo long rausim fil yunifom.”

Baki i givim tripela mun tasol long ol narapela senta long ol i ken rausim fil yunifom.

Em i tok moa olsem, ol polis patrol kar i nid long penim kala bilong polis stret na rausim ol dak glas.

Sas bai aplai long ol polis opisa na memba, sapos ol i no bihainim ol oda hariap.

Gavman bilong Papua New Guinea itok orait pinis long ol refugee iken stap wantaim yumi. Yumi mas larim ol long kisim wok na halivim yumi long developim kantri bilong yumi.

REFUGEES

LAIKIM HALIVIM BILONG YUMI

PNG ken halivim ol refugees long painim gutpela sindaun wankain olsem ol narapela kantri imekim.

Toksave ikam long Gavman bilong Papua New Guinea.

Tenkyu Tru
long halivim mipela

Nem: Haider Khan
Asples: Bangladesh
Wok: Sales & Marketing

Sitisen i givim TV long ol kalabus lain

WANPELA man long Sauten Hailans Provins na Gut Samariten, Vincent Somera, i givim tripela 21 ins televisen set long ol kalabus lain long Bui-lebi haus kalabus long Mendi.

Em i gat bel sori wantaim ol manmeri husat i stap insat long haus kalabus, long wanem ol lain i go long kal-

abus i no min olsem lo i stopim ol long olgeta samting. Kot i tok no gat long ol bai wokim wanpela samting long laik bilong ol, tasol long ol narapela samting, ol i fri long wokim taim ol i stap insait long haus kalabus.

“Ol i fri long toktok insait long haus kalabus, pilai, lukim nius TV na ol planti samting

moa,” Somera i tok.

Em tok moa olsem, ol manmeri husat i stap long haus kalabus em liklik namba tasol lon ai bilong God em i bikpela tumas, long wanem „God i makim nuspes bilong Em yet, taim Em i wokim man na ol i gat plen long laip bilong ol tu.

“Taim mi harim olsem yu-

pela i gat nid long TV skrin, mi gat bel kot pinis long helpim Koreksenel Sevis Dipatmen na bai ol tripela TV skrin long amamasim yupela,” Somera i tok.

Komanding Opisa Supiritenden Felixie Namane i bekim tok na i tok olsem, “Somera i givim dipela TV skrin long gutpela taim, long

wanem, PNG bai putim Pasi-fik Gem na ol nius lain bai putim long nius long olgeta taim long ol manmeri husat i stap long longwe hap bai lukim.”

“Ol kalabus lain long Bui-lebi i gat gutpela taim tude, long wanem, ol bai lukim gem long dispela ol TV skrin taim ol narapela lain ol i gat fri dom

long ples bai no gat sans long lukim gem,” Namane i tok.

Long wankain taim, Somera i givim K1000 long ol opisa na ol kalabus lain, na narapela K1000 long Tarangau Ragbi Lig Futbol Klap na em i klap bilong Koreksenel Sevis Tim, i save salensim Lokol Mendi Ragbi Lig Komposisen.

PNG i gat namba 4 benk

KINA Grup i kamap bikpela namba foa benk long PNG. Kina Grup, bikpela non benk fainensel institusen bilong Papua Nigini (PNG) i tokaut long agrimen wantaim Malaysian Benking Berhad (Maybank Grup) long kisim 100 pesen na lukautim long operating sabsideri long PNG, Maybank PNG Limited.

Nupela Maybank PNG bai lukim Kina Grup i kamap bikpela namba foa benk long PNG wantaim liklik kos bilong wholesel fanding. Dispela bai kamapim strongpela kompetisen posisen na ol sans bilong kampani long gro bhain taim.

Sif Eksekutiv Opisa bilong Kina Grup, Syd Yates, i tok olsem dispela senis bai givim

ol kastoma bilong Maybank PNG na Kina Grup long mekim isi long ol bai ol i gat bikpela sans long benking na ol fainensel sevis prodak aninit long wanpela hap.

Mista Yates i tok olsem Maybank PNG i gat gutpela benking bisnis wantaim strongpela kapitol na likwiditi posisen.

Em i tok moa olsem wanpela bikpela benefit bilong Kina Grup olsem ful benking laisens em olsem ol i gat liklik kos bilong wholesel fanding.

“Benking na ol fainensel sevis i bin gutpela pat bilong kain ikonmik olsem PNG i save gro hariap, wantaim GDP i soim kompaun grot reit bilong olsem 13 pesen moa namel long 2008 na 2014,” Mista Yates i tok.

Tambu long kisim kakaruk long Australia bai stap yet

Stanley Nondol i raitim

MINISTA bilong Egrikalsa na Laipstok, Tommy Tomscoll i tokaut long Palamen olsem PNG gavman i putim tambu long kisim kakaruk mit bilong Australia i kam insait i stap yet, na dispela tambu bai stap yet long gutpela bilong Papua Niugini.

Minista Tomscoll long mekim tok klia long wanem as gavman i putim tambu long ol impot kakaruk mit bilong Australia, i tok gavman i putim tambu long gutpela bilong kantri.

Em i tok Australia i no save kisim ol mit bilong kakaruk long ol narapela kantri na PNG i mekim wankain.

PNG gavman i putim

tambu long ol impot kakaruk mit bilong Australia long mun Mas 20135bihain long ol sampela ripot bilong ol sik bilong kakaruk na tu gavman i lukluk long helpim ol lokol fama long kakaruk bisnis.

Minista Tomscoll i tok PNG gavman i putim banis long ol baio sekyuriti sik o ol sik bilong kakaruk i no ken kam insait long poltri bisnis long PNG.

Em i tok dispela tambu em i gutpela bikos em i ken helpim ol lokol Papua Niugini bisnis na pipel long lukautim kakaruk na salim long ol bikpela kampani, na mekim mani.

Mista Tomscoll i tok dispela tambu i stap yet na i no pinis.

Em i tok taim gavman i

putim tambu, planti pipel long PNG i amamas bikos ol i ken salim kakaru long mekim mani, na dispela em i gutpela long ikonmi bilong kantri.

Dispela em i gutpela nius long PNG Poltri Asosiesen husat i bin wetim gavman long yusim lokol kakaruk long givim saplai long ol bikpela maket long kantri long helpim ol kakaruk fama.

Asosiesen presiden, Stanley Leahy, i tok ripot bilong IPA itok Poltri Indastri i save mekim K400 milien winmani long PNG long wan wan yia.

Mista Leahy i tok dispela mani em bilong 4-pela bikpela komesel Poltri Indastri bilong kantri olsem Zenag, CLTC long Banz, Tablebirds na Dothan.

Em i tok winmani i ken go wantaim wantaim ol nupela Poltri Indastri i kamap long kantri olsem L. R Group i mekim long Hela provins.

Mista Leahy i tok bikpela wari em long ol bikpela sik olsem Aivien Flu we i save kamap long ol kakaruk.

Na em i tok PNG em i wanpela kantri we isi long kisim ol kain sik i kam insait na bagarapim ol pipel na ol kakaruk bilong kantri.

Em it ok NAQIA i gat olgeta save na i ken wok wantaim ol gavman ejensi long banisim kantri long ol kain sik.

Mista Tomscoll i tok dispela tambu bai stap yet na em i taim bilong PNG i ken lukautim kakaruk bilong em yet na givim saplai long lokol maket.



Papua Niugini NESENEL AIDENTITI PROJEK



Gutpela bilong yu gat Nesenel ID Kat bilong yu yet



- ▶ Wanpela kat, wanpela vot long taim bilong eleksen; em bai stopim ol dabol vot.
- ▶ Em bai mekim isi, kwiktaim na ino tromoi bikpela mani long stretim Elekorel Rol.
- ▶ Strepela na trupela Elektorel Rol bai min olsem i gat moa wok ples klia na i no gat hait pasin, gutpela gavanens na lidasip i stap.
- ▶ Daunim kos bilong sense (tok save bai kamap long olgeta wan wan yia na i no nap wet inap narapela 10-pela yia long stretim senses).

“Yu mas Rejista nau na stap insait”

Depatman bilong Nesenel Plening i go pas long dispela





ABG ILEKSEN: Taim bilong vot long Bogenvil na nau ol kauning long wan wan rijon i go het. Nau ABG hetman, Dokta John Momis i wok long go pas long resis bilong presiden wantaim 8-pela narapela man, tasol Dokta Momis i go pas wantaim 22,214 (Risal bilong Tunde). Dispela i moa long 20,000 mak moa long Ishmael Toroama husat i wok long kam namba tu wantaim 5,382 vot (Tunde), Sam Akoitai i bihainim na sanap long namba tri mak wantaim 4,861 vot. Ol narapela em long Sam Kauona wantaim 2715 vot, Rueben Siara wantaim 1,380 vot, Justin Pokata wantaim 1,064, Simon Dumarinu wantaim 459 na Peter Nerau wantaim 378 vot. Kauning i bin stat long las Sarere na i wok long go het. Ol i diklerim pinis ol wina long sampela konstituensi. i no gat hevi o meknais na olgeta wok long ABG ileksen i go gut tasol long olgeta hap bilong Bogenvil.



SDA SIOS BUNG TOKTOK: Embaseda bilong Amerika long PNG, Walter North i bung wantaim Presiden bilong PNG Yunien Misin bilong Seven De Edventis Sios na KOve Tau em Presiden bilong Sentrel Papua Konpresns long toktok long global miting bilong SDA sios bai kamap long San Antonio, Texas long Amerika. Plantiu lain long PNG i plen long go long dispela bung. Embaseda na ol SDA lida i bin glasim ol plen long bung na serim ol tingting long SDA global kempen long strongim fridom bilong rilijen. *Poto: US Embasi*



AIYOO! Snekman long ples Bua, Morobe provins i raunim snek long Baton taim Oil Search Pasifik Gems Rilei Baton tim i go kamap long hap.



LEDABEK TRAUSEL: Projek bilong lukautim ol ledabek trausel i skulim ol pipel long Madang long rot bilong tegim o putim mak long trausel na putim em i go bek long solwara. Wenceslaus Magun em wanpela man husat i papa bilong sevim ol ledabek trausel long PNG i bin statim projek long yia 2006. Projek i go het yet long kari-maut ol awenes wok log sevim ol dispela trausel bikos i no planti nau i stap long wol. *Poto: Wenceslaus Magun*



TETE WELKAM: Ol lain long Tete Setelmen long Mosbi i welkamim ol Gems Ogenaising Komiti taim ol i wokim wanpela raun long setelmen long las wiken. *Poto: MadNESS Photography*



BILUM BILONG GEMS: Bilum bai kam gut long namba 15 Pasifik Gems long Mosbi klostu taim na Gems Ogenaising Komiti (GOC) i wokim disisen long givim ol bilum i go long ol etlit na ol opisel. Ol sampela meri grup long kantri nau i wok hat long wokim samting olsem 3,000 bilum long prisenim i go long ol etlit na ol bik manmeri. Opis bilong Wimen in Bisnis i bin givim sampela bilum i go long ol GOC woklain long las wik olsem dispela poto i soim. *Poto: MadNESS Phtography*

Jubili Sekenderi skul holim kaiserel de

KALSA na tumbuna pasin i bikpela samting insait long PNG we yumi i no ken lusim.

Olsem na Edukesen Dipatmen i putim insait long program bilong ol wan wan skul long kantri olsem ol i mas luksave long dispela na makim wanpela de olsem kaiserel de.

Mekim na long olgeta yia, ol wan wan skul long kantri i save gat kaiserel de.

Long las wiken, Jubili Katolik Sekenderi skul insait long Mosbi i bin holim kaiserel de bilong ol.

Olgeta kaiserel grup bilong ol wan wan provins i bin putim kamap ol bilas, singsing na danis long makim ol provins bilong ol.

Skul i bin paialait wantaim ol kain samsam, singsing na kalakala bilas we ol sumatin, ol tisa na ol papamama i bin amamas wantaim long promotim ol provins na kantri.

Poto i soim kaiserel de bilong Jubili na ol ektiviti we sumatin i makim ol wanwan provins, kalsa na tumbuna bilas na pasin bilong ol.



Tupela sumatin man na meri i makim tumbuna bilas na kalsa bilong Simbu Provins long Hailans rijon taim



Poto i som ol meri sumatin i putim naispela bilas bilong Hailans rijon yet na



Poto i soim tupela sumatin meri i putim naispela tumbuna bilas bilong Momase rijon. Ol Poto: Peter Maima

Papamama i namba wan tisa

Esther Bralyn Wani i raitim

“OL papamam i mas mekim olsem wok bilong ol na pilim hevi long bikhet pasin bilong ol pikinini bilong ol,” Jenerel Seketeri bilong Katolik Bisop Konprens long PNG na Solomon Ailan, Pater Victor Roche i tok.

Em i wari long ol skul pait i kamap na ol kalt pasin i wok long kamap long ol skul we bai bagarapim nem bilong kantri.

Dispela em i tok bihain long Holy Spirit Hai Skul long Bogia insait long Madang provins i paia taim skul pait i kamap.

Pater Roche i tok, “Vailens i no inap pinis hariap long wanem, ol tisa i mas skulim ol pikinini long ol gutpela pasin we ol i ken kamap gutpela pikinini.

Tasol em i tok ol tisa i mas gat ol gutpela veliu o pasin pastaim bipo long ol i skulim ol pikinini long wanem ol pikinini bai bihainim ol.

Em i tok moa olsem ol skul i mas gat ol kos olsem Rilijes Edukesen o RE insait long skul kurikulum bilong ol olsem ol narapela kos.

Na tu, em i tok gavman i mas putim strongpela long husat i bagarapim ol samting bilong skul na husat i mekim pasin bilong kalt.

Long wankain taim, Nesenel Katolik Edukesen Seketeri, Joseph Direkoro i sapotim toktok bilong Pater Roche olsem pasin bilong lainim ol pikinini i save stat long haus wantaim papamama.

Mista Direkoro i tok ol papamama bilong ol pikinini i mas mekim ol samting we pikinini bai bihainim.

7-pela sumatin tisa long Australia i kam long PNG

Esther Bralyn Wani i raitim

OL 7-pela tisa sumatin long Federesen Yunivesiti long Australia i kam long Papua Niugini wantaim senia leksera o tisa bilong ol aninit long dispela Australia New Colombo Plan (ANCP).

Dispela ANCP i bin stat long ol yia long 1950s long lukluk long kamapim koneksen namel long ol pipel na bungim ol rijon wantaim bai stap longpela taim. Em i bikpela plen bilong foren polisi bilong Australia gavman.

Ol i makim 12-pela sumatin long kam long dispela 2015 raun tasol 7-pela i kam na 5-pela tisa sumatin bai kam long neks yia. Ol 7-pela sumatin tisa bai trening long wok tisa insait long 4-pela wik long Oro provins na wok wantaim ol tisa long

Kokoda Elementri Skul na Kokoda Skills Trening Senta.

Hai Komisina bilong Australia long PNG, Deborah Stokes i tok tenkyu long gavman bilong PNG long tok orait long stap insait long dispela plen, na Edukesen Dipatmen bilong PNG long helpim long putim ol sumatin long hia na tu long Oro provins.

“Gavman bilong Australia i amamas long wok bung wantaim gavman bilong PNG na ol komyuniti bilong Kokoda eria. Long wok bung wantaim bai mipela bai impruvim ol rot bilong kisim edukesen, givim gutpela medikol tritmen long Trek, bildim klin na seif wara na yusim ol klinpela samting long komyuniti,” Mis Stokes i tok.

Em i tokim ol sumatin tisa long traime na save long ol asples pipel,

save gut long kantri, bildim wok pren na mekim ol koneksen long wanem ol i no makim skul bilong ol tasol, ol i makim Australia tu.

Senia Leksera bilong Federesen Yunivesiti, Dokta Bob Davis, i tok dispela i nupela ekspirians bilong yunivesiti na ol i amamas long wanem em bai givim bikpela save long ol sumatin.

Em i tok moa olsem dispela bai wanpela sensim laip bilong ol na bai ol i ken lainim sampela samting na helpim komyuniti bilong ol yet tu.

Long wankain taim, Profesa David Kavanamur i tok olsem mipela i amamas olsem yupela i makim PNG.

Profesa Kavanamur i tok PNG i gat spesol ples long Australia na Australia tu i gat spesol ples long PNG.



Hai Komisina Deborah Stokes, Profesa David Kavanamur wantaim ol 7-pela tisa sumatin na senia leksera, Bob Davis.

NRI dairekta i pinis long wok

DAIREKTA bilong Nesenel Riset Institut (NRI) long 11-pela krismas, Dokta Thomas Webster i lusim wok bilong em long menesmen level olsem dairekta.

Dokta Webster i gat 59 krismas na em bilong Hagen long Westen Hailans Provins. Em i bin stap olsem dairekta bilong tink-tenk long 11-pela yia. Em i bin go pas long senisim dispela institusen.

Long dispela em i save olsem i gat ol yangpela ol manmeri husat i gat strong na kain kain save long karim aut wok we ol i bin statim.

Dokta Charles Yala husat i bin wok wantaim ol olsem yangpela risesa long 20 krismas bai kisim ples bilong Dokta Webster.

Dokta Webster i no inap lusim institut olgeta, em bai wokim sampela risets na givim sampela sapot long ol dibet na diskasen long ol bikpela samting long kantri.

Em i bilip olsem Dokta Yala bai i go pas long dispela institusen gut na strongim ol wok long bihain taim.

Madang gavman i mas stretim haus marasin

James G. Kila i raitim

OL PIPEL bilong Long Ailan long Madang provins, i wetim yet mani-helpim long Madang Provinsal Gavman bilong stretim haus marasin bilong ol na long kisim nupela wara saplai projek.

Wod 32 kaunsila bilong Saidor LLG, Mathias Korima long las wik i tokaut long NBC Redio Madang 'Sain Gamun' program olsem ol pipel i wetim tok promis we wanpela opisa bilong Gavana Jim Kas i tokim ol long en. Tasol ol i wet longpela taim na ol i belhat.

Mista Korima i makim maus bilong ol long askim nau long pablik olsem long mun Oktoba long las yia, Thomas War, wanpela wokman long opis bilong Gavana Jim Kas, i bin go long Long ailan na tokaut long pablik olsem opis bilong Gavana i gat mani i stap pinis long stretim ol haus-marasin long ailan.

Em i tok, dispela opisa i bin bungim ol lida namba wan taim long Poin Kiau na i tokim ol olsem Madang provinsal gavman i redim pinis wanpela K50,000 long stretim haus marasin bilong wod 33 na 34.

Kaunsela Korima i tok bihain dispela opisa i bungim em long ples Matapun, we em i tokim Mista Korima olsem Madang provinsal gavman i redim K70,000 long stretim haus-marasin long ples Matapun we bai helpim ol pablik sevan na ol arapela wok lain i save stap long hap.

Mista Korima i tokaut tu olsem dispela opisa bilong opis bilong gavana i bin tokim em olsem opis bilong gavana i redim pinis mani mak olsem K264,000 long wokim nupela wara saplai long Matapun, we bai helpim ol pablik sevan olsem ol tisa, helt woka na ol arapela i stap long Long Ailan.

"Ol pipel bilong mi long Long Ailan i wet longpela taim na ol haus marasin i go bagarap nau na mipela no harim wanpela toktok i kam long opis bilong Gavana Kas," Kaunsela Korima i tok.

"Mipela laikim Madang provinsal gavman i no ken westim moa taim na givim dispela mani em i tokaut long en na wok i ken stat," em i tok.

Mercy Works go pas long intenesenel de bilong helt bilong ol meri

Sape Metta i raitim

TAIM ol bikpela seremoni na selebren i save kamap long Goroka wanpela sios ogenaisesen i save i go pas long ol dispela ol seremoni na selebren. Mercy Works PNG husat i wok aninit long Katolik sios i save amamas long bungim ol man, meri na pikinini long selebretim ol kain kain bikpela bung.

Long dispela mun, Mercy Works i bin i go pas long Intenesenel De bilong Eksen Egensim Wimen's Helt long Goroka.

Dairekta na kodineta Sista Maryanne Kolkia i tok, "Mercy Works i luksave na na tingim ol meri long dispela de, long wanem, helt bilong ol mama na ol meri em i bikpela samting. Bikos long ol meri, ol i save karim pikinini na dispela ol pikinini tasol i bildim na developim kantri bilong yumi."

Em i tok, Mercy Works i save strongim tu wok bilong self rilaiens, olsem na em i save givim fri trening long planti meri na sampela man tu long wok bilong mekim kamap samting long helpim yu yet.

Sista Maryanne i tok trening bilong samap, kuk, beik, wokim ol sop, wokim ol kaikai bilong kakaruk, blits o marasin bilong wasim ol sospen na ol arapela skil, em i fri sevis ol i givim long ol pipel.

Em i tok amamas olsem planti ol meri na sampela man tu i luksave na kamap long kisim trening, long wanem, ol i laik kamapim samting long helpim sindaun bilong ol yet. Em i tok dispela em i gutpela moa long helpim ol yet long kamapim gutpela sindaun insait long wan wan komyniti bilong ol.

Sista Maryanne i tok Mercy Works long las 6 yia i givim ol skil

trening long platni ol meri na ol man tu long ranim ol liklik bisnis bilong ol.

"Ogenaisesen i wok long givim ol skil trening yet long ol man na meri na mipela ol Mercy sista i amamas olsem dispela ol trening mipela i givim i wok long karim gutpela kaikai we ol man na meri i kisim gut trening i go bek long haus lain bilong ol na mekim yus long dispela save ol i kisim long Mercy Works Trening Senta long YC Hol long Goroka," Sista Maryanne i tok.

Em i tok, trening em i fri na husat ol man na meri laikim skil trening, dua bilong Mercy Works Trening Senta em i op i stap long helpim ol. Bikos em i Intenesenel De bilong Eksen Egensim Wimen's Helt, ol meri husat i save i go na kisim trening long Mercy Works trening senta i bin kamap na soim ol klos, kaikai na ol arapela samting ol yet i bin wokim na selebretim dispela de wantaim ol singsing, danis na ol arapela ektiviti tu.



Melanesian Trustee givim K50,000 long PNG Kensa Faundesen

Frieda Sila Kana i raitim

BIKPELA moning ti em i wanpela we bilong PNG Kensa Faundesen i save kamapim ol mani bilong sapatim wok bilong painim aut kensa na givim marasin long PNG.

Long Mande 25 Me, Melanesian Trustee Services Limited (MTSL), wanpela praivet kampani long Pot Mosbi i bin holim wanpela moning ti kaikai long Crown Plaza Hotel we Embeseda bilong PNG Kensa Faundesen, Lady Linda Babao O'Neill i bin stap wantaim CEO bilong PNG Kensa Faundesen na ol woklain bilong em i bin stap.

Sif Eksekutiv Dairekta bilong MTSL, Mista Kennedy Wemin i tok ol i donetim K50,000 long PNGCF bikos em i gutpela samting. Ol i laikim toksave na skul i mas i go aut long ol rurel eria na helpim bilong ol long dispela yia em ol i laikim bai go long wok bilong painim aut na tritim sik Sevaikel Kensa long ol meri long rurel ples.

"Ol meri em bikpela samting. Mi ting olsem i no gat inap toksave i go aut long rurel eria long dispela sik


sevaikel kensa long ol meri olsem na dispela donesen bai go long wok bilong painimaut dispela sik na long kisim marasin," Mista Wemin i tok.

"Mi wari long harim olsem dispela kain moning kaikai em sampela lain long ol bus ples tru i holim na ol i kamap wantaim mani olsem K40 na K50 tasol ol i givim long kensa faundesen long mekim wok bilong daunim kensa long kantri. Mi laikim mipela bai mekim wankain samting olgeta yia na bai mipela givim wankain mak bilong mani inap long tripela yia bihain," Mista Wemin i tok.

Mista Wemin i tok olsem olgeta lain i mas kam insait tu na sapatim dispela gutpela wok. Ol pipel long ol liklik ples i wok long kamapim K40-K50 long givim bikos ol i bilip long dispela wok. Ol bikpela kampani long taun na siti i ken wokim wankain tu," em i tok.

PNG Kensa Faundesen Sif Eksekutiv Opisa, Dadi Tok Jnr i tok, ol i go pinis long 6-pela provins long dispela yia, olsem na MTSL i laikim helpim ol long ol mas go yet long olgeta 89 distrik bilong kantri.

"Mipela i amamas long givim sapat," em i tok.



L-R MTSL / PBF Bod Siaman Robert Igara, Pes Ledi Lynda Babao O'Neill, MTSL /PBF CEO Kennedy Wemin na PNG Cancer Foundation CEO Dadi Toka Jnr. Foto: MTSL media



Ol mama (long l - r) Mary Awei, Mere Iku na Helen Metta i soim ol fam bret na bisket wantaim risev polisman Plastik Kokorime long taim bilong selebren bilong Intenesenel De bilong Eksen Egensim Wimen's Helt long Goroka. Dispela ol mama i save go na kisim trening bilong kuk na beik long Mercy Works Trening Senta long Goroka.

Sheila Susuke, Theresa Samson, Vivian Tasi, Monica Steven na Olive Hairoi i soim ol kalakala siot em ol yet i samapim long taim bilong trening long Mercy Works Trening Senta. Ol i kamap, wokim samap demonstresen na soim ol siot na ol arapela klos em ol yet i samapim long taim bilong Intenesenel De bilong Eksen Egensim Wimen's Helt. Dairekta na Kodineta bilong Mercy Works long lsten Hailans, Sista Maryanne i sindaun lukluk i stap.

BSP meri eksekutiv kisim namba wan luksave prais

BENK Saut Pasifik (BSP) eksekutiv, Hari Rabura i bin kisim awod bilong "Best HR Practitioner 2014" long Papua Niugini Human Risos Institut (PNGHRI).

Mis Rabura, em Deputi Jeneral Menesa bilong Human Risos bilong benk. Em i namba wan meri opisa long kisim mak antap tru olsem eksekutiv menesa mak long BSP na long PNG i no gat planti meri i save kamap long dispela kain mak yet. Dispela awod em i luksave long wok bilong em long lukautim ol wokman na wokmeri insait long benk.

Mis Rabura i bin kisim wok long BSP olsem wanpela greduet treni opisa long 2001 na em i mekim rot bilong em i go antap. Long 2006 em i lusim BSP long wok moa wantaim ol narapela kampani na i kam bek gen long 2014, na long Ogas 2014, ol i makim em olsem deputi menesa bilong human risos.

Praim Minista Peter O'Neill i bin givim dispela awod long Mis Rabura.

"Mi amamas tru long kisim dispela namba wan kain awod. Em i kamapim bikpela driman bilong mi kamap ples kliia wantaim helpim bilong PNGHRI," Mis Rabura i tok bihain tasol long em i kisim dispela awod.

Em i tok tenkyu long BSP HR tim, na menesmen long ol i soim bilip bilong ol long em na long sapotim senis we HR BSP i wok long en.

"BSP em i gutpela ogenaesen we i save go pas long human risos developmen na i save givim sans long ol meri," em i tok.

Miss Rabura i gat Edukesen Digri long Yunivesiti bilong Goroka na em i stap long BSP Lidasip Program bilong kisim lidasip na menesmen kos long Melbourne Business School.



Mis Rabura kisim awod bilong "Best HR Practitioner 2014".

PMV trak helpim ol ples mama

OL fres kaikai na na kes krop fama long Maigari Inlen Paiplain eria bilong Ramu NiCo Projek i amamas nau olsem ol i gat PMV trak.

Nesenel Gavman i givim dispela PMV trak bilong helpim na senisim laipstail na sindaun bilong ol femili long ples.

Ol i tok dispela PMV trak i mekim hevi bilong ol long transpot bilong bringim gaden kaikai i go salim long Madang taun i go isi nau. Ol i kisim gutpela mani nau bikos long dispela transpot.

Dispela PMV trak em gavman i givim aninit long Wimen in Maining (WIM) Smol Gren Projek (SGP) we mani sapot i kam long Wol Benk em Mineral Risoes Atori (MRA) i menesim.

Jessica Punawa, wanpela lokal fama bilong Ono viles i tok em i save kisim moa long wanpela aua long bringim gaden kaikai bilong em i go salim long Madang


taun maket. Tasol nau PMV sevis i long waben trak nau i stap redi tasol na em i amamas long kisim kaikai long gaden na bringim i go long taun.

Narapela kes-krop fama, Kerry Kuku bilong Maigari eria tu i amamas olsem nau em i ken karim ol kopi beg bilong em wantaim dispela PMV trak na i go long salim.

Skipa bilong moto-bot bilong lain mama long Kostal Paiplain Wimen Grup, William Kupat i tok moto-bot gavman i givim ol meri i sevim ol gut stret.

Em i tok planti taim dispela moto-bot i save bringim ol sik lain i go long Modilon haus sik, na tu helpim ol mama long ples long bringim gaden kaikai bilong ol i go salim long Madang taun.

Planti ol lain long ples insait long foapela asosiesen long Ramu Nikel Projek eria long KBK, Inlen Maigari, Kostal Paiplain na Basamuk i amamas long dispela gutpela helpim i kam long Nesenel gavman.



PMV trak bilong ol Maigari wimen grup helpim ol gut.

'Tep Tok' i soim stail bilong makim bodi

Frieda Sila Kana i raitim

FOAPELA meri ol i hapkas bilong Papua Niugini na Australia i wokim wanpela muvi piksa bilong stori long pasin bilong tatu o makim bodi wantaim ol disain bilong tumbuna long Sentral Provins bilong Papua Niugini.

Dispela 4-pela meri em mama bilong ol bilong Sentral Provins tasol ol i no gat makmak bilong ol meri long bodi bilong ol, bilong wanem ol i bin go long skul taim ol i yangpela yet na skul i kisim ol i go long Australia na ol i marit long hap.

Long las wik Fraide meri go pas long dispela grup na dairekta bilong dispela muvi ol i kolim 'Tep Tok', Julia Mageau Gray i bin tok olsem long taim bilong soim dispela muvi bilong wokim tatu olsem ol dispela meri i bin wari stret olsem pasin bilong ol meri i kisim makmak long bodi em i wok long dai.

Dispela muvi piksa em ol i wokim inap long tripela yia olgeta. Mis Julia i tok ol i bin plen long wokim insait long tripela mun. Tasol em i go olgeta long tripela yia bilong wanem ol i go long 4-pela kantri long lukim wanem kain stori i stap long wok bilong tatu o makmak long bodi.

Laik na tingting bilong ol dispela meri em long painimaut wanem as na ol tumbuna mama bilong ol i bin gat ol naispela makmak long bodi tasol nau ol kasen bilong ol na ol mama na anti bilong ol i no gat ol dispela wankain makmak.

Dispela tingting bilong em i kisim ol i kam long Sentral Provins long Mekeo na Hula na Tubusereia long painimaut long stori baksait long ol makmak long bodi. Na wanpela bikpela tok ol i painim aut em

olsem taim ol misineri i bin kamap long graun bilong ol long Sentral provins ol i bin tokim ol pipel olsem pasin bilong mekim makmak long bodi em i no gutpela olsem na ol i lusim olgeta.

Julia wantaim tupela pren na sista bilong em i bin go long Nu Silan, na long narapela Pasifik kantri na ol i lainim pasin bilong wokim tatu.

Dispela muvi piksa, *Tep Tok: Reading between our lines* em i soim namba wan taim long Papua Niugini olsem wanpela hap bilong Australia wik. Ol dairekta bilong dispela piksa i bin soim long PNG Museum na At Galeri long Waigani wantaim helpim bilong Australia Hai Komisen.

Dairekta Julia Mageau Gray i tok, pasin bilong wokim makmak long bodi em i save kamap tude yet wantaim ol yangpela man na meri, tasol em long taun tasol. Na em i sori tru long lukim olsem long ol ples tru em dispela pasin nau em i wok long dai isi, isi.

"Tep Tok emi wanpela muvi piksa we mipela i wokim long traim long senisim dispela sindaun nau. Mipela laik bringim bek pasin tumbuna bilong yumi long ol meri i mas wokim makmak long bodi. Em i mak bilong strong bilong yumi ol meri na tu i givim yumi ples bilong yumi sanap strong insait long komyniti bilong yumi," Mis Mageau Gray i tok.

"Taim mipela i go lukim pasin bilong ol narapela Pasifika kantri i wokim makmak long bodi, em i olsem mipela i kisim win gen long kirapim bek pasin kastom bilong yumi we i wok long dai isi, isi," Mis Gray i tok.

Dispela piksa em ol i wokim long Australia, Papua Niugini, Nu Silan, Samoa, Tahiti na Cook Ailan we Sunameke Prodaksen i kamapim.



Dairekta bilong muvi piksa, 'Tep Tok: Reading between our lines', Julia Mageau Gray i toktok long lonsim bilong dispela muvi long las wik insait long PNG Musium na At Galeri long Pot Mosbi. Foto: Frieda Sila Kana



Silva Jubili

LONG Me 19, 2015, mi bin joinim ol manmeri bilong Mirap Peris insait long Madang Asdaiosis long selebretim silva jubili bilong Pater Gregory Jehanus SVD, wanpela wan-skul bilong mi, na Bruder Karel Boro SVD.

Pater Gregory i selebretim 25 yia long kamap Pater na Bruder Karel i selebretim 25 yia long promis bilong em long mekim wok wantaim lain Divain Word Misineri (SVD). Tupela i kam long kantri Indonesia na mekim wok misin long kantri Papua New Guinea.

Haus lotu bilong Mirap i pulap tru wantaim ol yangpela man na meri. i no gat planti ples insait long haus lotu, olsem na planti papa mama na bikpela manmeri i stap ausait long haus na bihainim lotu misa.

Pate Gregory i go pas long santu Misa, na mi olsem wanklas bilong em, i givim skul long taim bilong santu Misa. Mi no mekim planti toktok. Mi glasim na skruim tok stia bilong tupela i go wantaim namba wan rit bilong Santu Misa long buk bilong Wok bilong Aposel 20: 17-27.

Tok stia bilong Pater Gregory i kamap long pas bilong St. Paul i go long Galatia 1: 12; "Mi no kisim dispela Gutnius long han bilong man.....Krais yet i soim mi...." Na tok stia bilong Bruder Karel: "Dispela wok God i laikim." (John 6:6)

Tupela i stap strong long mekim wok bilong ol bikos tupela i tingim oltaim dispela tok stia bilong ol i olsem wanpela samting i helpim ol long mekim wok. Long taim bilong hevi na wari, dispela tok stia i save kamap long tingting bilong ol na helpim ol long stap pas olgeta taim, bikos God i save sambai long ol.

Asbisop Steven Reichart OFM Cap, bilong Madang Asdaiosis, i bin tok tenkyu long tupela na em i amamas tru bikos ol yangpela manmeri tasol i pulamapim tru haus lotu na ol bikpela manmeri i sanap ausait olsem was long ol.

Em i tok strong long ol yangpela long tingim dispela selebresen na sapos God i singautim ol, no ken larim singaut bilong God i go nating nating.

Pater Gregory na Bruder Karel, tupela tu i bin harim singaut bilong God, na tupela i no larim singaut bilong God i go nating. Tupela i bin bekim singaut bilong God olsem na ol i luksave gut long God na bihainim stret tok stia i save stiaim ol long bekim singaut bilong God.

Bihain long Misa i gat bikpela bung kaikaikai i kamap long Peris Hal, Pater Gregory yet i bin wokim kamap nupela peris hal.

Bihain long kaikai long hal, ol manmeri i bungim planti presen i givim long Pater Gregory na Bruder Karel. Planti pik wantaim gaden kaikai i pulap tru long fron bilong haus lotu. Ol manmeri i soim amamas bilong ol long hat wok bilong tupela na serim kain kain presen i go long tupela.

Long dispela we tu, ol manmeri i soim sapot bilong ol long wok misineri na ol wokman bilong sios. Em i trupela pasin bilong manmeri. Long wanem hap yu go, ol manmeri bai amamas na sapotim wok bilong yu. Sapos yu wokim gutpela wok bilong God namel long ol, ol i bai soim bikpela rispek na soim tenkyu bilong ol long givim kain kain presen long yu.

Bihain long selebretim wantaim manmeri bilong Mirap Peris, tupela bai go long asples bilong ol long Flores Ailan long Indonesia long selebretim wantaim ol famili bilong ol. Bikpela selebresen bai kamap yet. Em i jubili yia bilong tupela.

Yumi serim amamas wantaim ol long prea long helpim ol.

Vatiken bildim ol haus waswas bilong ol strit lain

I kam long Zenit Nius Ejensi, Rom

OL lain i no gat ples bilong stap long en long Rom nau i gat ples bilong waswas na toilet bihain long Vatiken i bildim ol haus waswas bilong ol.

Klostu long pinis bilong las yia, Pop Francis li bin givim tok orait long komisenim tripela sawa o ples bilong waswas long eria aninit long Sen Peter's Skwea long Vatiken.

Ol i wokim ol dispela ples bilong waswas

long eria i gat ol toilet blok we ol turis na ol pilgrim i save yusim

Ekspiriens bilong man husat i go pas long opis bilong Pop long givim aut ol helpim i go long ol tarangu lain, Asbisop Konrad Krajewski, i bin strongim tingting bilong Pop long bildim ol sawa rum long Vatiken we ol i wokim tu long 10-pela arapela peris long Rom.

Asbisop Konrad libin bungim wanpela man i gat 50 krismas bilong Sardinia i no gat ples bilong stap long strit bilong Rom na bikos em i bonde bilong dispela (homeless) man, Asbisop i bin laik baim em dina, tasol man i les bikos em i no waswas na em i smel.

Maski em i les, Asbisop Konrad i bin kisim man ya i go aut long dina long wanpela Saina restron na tupela i stori.

Man ya i tok bikpela samting ol manmeri

i raun long strit na i no gat ples bilong stap i laikim stret em ples bilong waswas.

Em bin tok ol i ken painim kaikai, tasol ples bilong waswas em samting ol i laikim tru.

Asbisop i bin kisim mesej o toktok wantaim ples bilong em (Asbisop Konrad) long wokim ol sawa insait long Vatiken i go long Pop Francis, na Pop i bin tok oraitim kwiktai.

Asbisop i bin askim narapela 10-pela peris long Rom long bildim ol sawa long ol peris graun bilong ol na ol lain i no gat ples i ken yusim.

Sariti bilong Pop i givim mani long kari-maut dispela projek.

Katolik Sariti ogenaisesen, Sant'Egidio, i tokaut olsem i gat samting olsem 8,000 homeles pipel o pipel i no gat ples bilong stap na ol i raun slip long ol strit bilong Rom.

Lae siti seket Sande skul tenksgiving

...Ol Sande skul pikinini amamasim de

Paulus Tali i raitim

LONG las Sande em Pentekos Sande, moa long 1,000 Sande skul pikinini i kamap long tenksgiving de bilong ol long Resureksen Lutheran Sios long Top Town long Lae.

Ol pikinini i kam long ol peris bilong Evanjelikel Lutheran Sios long Lae siti.

Dispela ol peris i bin stap insait long Lae siti seket em ol i stap insait long Yabim Distrik bilong Evanjelikel Lutheran Sios long Papua Niugini (ELC/PNG).

Ol Sande skul pikinini kam wantaim ol papa mama bilong ol bringim kaikai na mani long bungim long dispela de bilong ol. Olgeta peris i kam long kala wantaim kain kain bilas na singsing na danis.

Reveren Baafekek Bamirinc, pasto bilong Resureksen Sios na presiden bilong Lae siti seket i autim tok bilong God long dispela taim.

Em i tokim ol, "Yupela kam long wan wan peris bilong yupela wantaim tisa na papamama em i gutpela pasin olsem long Buk Baibel we Jisas i tok larim ol liklik pikinini i kam long mi, kingdom em bilong ol kain liklik pikinini olsem."

Reveren Bafekek askim kwesten long ol pikinini na ol i bekim gut ol.

Em i tok, "yupela nau em God Papa i luksave long yupela

pinis olsem sios bilong God em yupela na Holi Spirit i pulap long yupela nau yupela kamap hia long amamasim tenksgiving program."

Pasto Baafekek i askim ol papamama long stopim ol pikinini long mobail pon na long-gol kain samting we inap daunim gutpela Kristen laip.

Em i tokim ol pikinini olsem program bilong ol i bihainim tok bilong Pentekos De na God i ken blesim ol long wanem laip ol i stap long em.

ELC Yabim Distrik Sande skul Kodineta, Tainam Mek i tok tenkyu long ol papamama long kam wantaim ol pikinini na salensim ol long sidaun bilong ol long haus long ol i mas lukautim gut pikinini na givim gutpela gutpela skul tok na ol pikinini i mas rispektim ol.

Seket Sande skul Kodineta, Peter John i tok ol pikinini olsem kain program olsem em i bilong bringim ol long save long arapela na tokim ol arapela long stap wanpela insait long banis bilong Bikpela Jisas.

Ol pikinini i soim moa amamas taim ol i kam long wan wan peris bilong wantaim kala na bilas na singsing.

Sampela bilong ol peris i bin kamap em Resureksen, Ridima, Sen Timothy, Kalvari, Intung, Benong, Wanbel, Kaiser, Sen Barnabas, Bethel na Sios ov Hop.



Sampela Sande skul pikinini bilong Kalvari Peris long Saina taun, Lae i putim ol tumbuna bilas na i redi long go insait long ol program bilong tenksgiving de. Foto: Paulaus Tali

Ol Kalvari Lutheran Peris lida kisim blesing Paulus Tali i raitim

KALVARI Peris long Saina Taun insait long Lae siti seket i bin lukim ol nupela lida i bin kisim blesing long statim nupela wok bilong ol. Planti Kristen kamap long witnesim dispela lotu.

Reveren Busim Wangia bilong Martin Luther Semineri na Reveren Elisa Didi bilong ELC Yabim Distrik i bin go pas long dispela lotu.

Reveren Didi bin tokim ol Kristen bilong Kalvari Peris olsem Tok bilong God tasol em ki o bikpela samting insait long laip bilong yumi.

Em i bin tok ol Kristen bilong Lutheran Sios i mas bilip olsem Tok bilong God tasol em bai yumi inap sanap antap long em na soim bilip long laip bilong yumi.

Em i bin tok ol olupela lida i bin bringim sios i kam inap nau senis i kamap long nupela long kisim ples.

Em i bin tok ol nupela lida bai mekim wok insait long 10-pela kongrigen bilong peris.

Reveren Didi i bin tokim ol nupela lida olsem pasin bilong kamap lida em i no long yu sanap yu yet, no gat.

"Oltaim yu mas wok bung na kamapim wanbel. Wok lida insait long sios i no bilong wanpela man, em i bilong olgeta Kristen olsem, na pasin bilong wanbel i mas stap na bai ol Kristen bilip manmeri i lukim ol lida i mekim gutpela wok na bai ol i sapotim.

Nupela presiden em Firiefe

Erunuka husat em i save wok klostu wantaim Morobe Gavana, Kelly Naru.

Ol nupela lida em peris presiden, Firiefe Erunuka, vais presiden em Wari Dubo, Seketeri, Giam Hosea, Tresera John Nicholas, Het Meri Cathy Iga, Yut Kodineta Daniel Kalal na Sande skul kodineta em Gida Bobby.

Nupela presiden, Mista Firiefe i bin autim tok amamas long ol Kristen i makim em wantaim ol arapela lida, na tok emna ol wanwok bilong em bai givim ol taim long karim wok bilong peris long sanap wantam.

Em i tok yumi ol Kristen yet i mas sanap wantaim na ol lida i ken lukim wok bilong yumi na givim sapot bilong ol.

Morobe Gavana, Kelley Naru i bin givim tupela pik na ol kaikai long sapotim program bilong dispela de.

Gavana Naru i bin tok em bai sanap baksait long lukim sios wok i ron gut.

Em i bin tok tu long sapotim Lae siti seket long K10,000 long wokabaut long sinod ba kamap long neks yia, 2016.

Presiden Erunuka i tokim ol nupela lida bilong peris long sanap strong long Tok bilong Bikpela olsem i stap long Mark 8:34, "yumi mas daunim yumi yet na karim wok bilong sios na pre bai God inap blesim yumi."


Ol nupela lidas bai lukluk long 5 yia developmen plen bilong peris, Mr Erunuka i tok.



Ol nupela lida bilong Kalvari Peris long Lae bihain long instalesen lotu em Katu Iga, Daniel Kalal, Firiefe Inare, na John Bilang. Foto: Paulus Tali

Em nau! Ol pikinini i ken painim rot i go long ples wantaim Wantok kru...

Sudoku



		1	5	4				
					6	7		
	7		1				5	3
6				2			8	4
		2	8		5	9		
5	8			9				7
4	9				8		7	
		5	4					
				6	1	4		


2					1	7		3
4	6				2		5	
		1	3	9				
	2	5		4			1	
		8	2		9	4		
	1			5		3	2	
				7	6	1		
	4		1				9	6
1		6	9					8

Ansa bilong Sudoku # 107 na # 108 neks isu


4	9	3	7	8	6	2	5	1
1	5	7	2	3	4	8	6	9
2	8	6	1	9	5	3	7	4
9	3	2	6	1	8	5	4	7
5	6	4	3	2	7	9	1	8
8	7	1	5	4	9	6	2	3
6	1	9	4	5	3	7	8	2
7	2	8	9	6	1	4	3	5
3	4	5	8	7	2	1	9	6

7	6	3	2	4	1	9	5	8
4	1	8	7	9	5	3	6	2
5	9	2	8	3	6	7	1	4
3	8	5	6	2	7	4	9	1
6	2	1	9	5	4	8	7	3
9	4	7	3	1	8	5	2	6
2	5	6	4	8	9	1	3	7
1	3	4	5	7	2	6	8	9
8	7	9	1	6	3	2	4	5

Ansa bilong las wik Sudoku # 105 na # 106



EM ORAIT




EM NOGUT

Ol wod lista hia:

- AGRI
- AIDIA
- BAKET
- BAPTAIS
- DAKA
- DRIMAN
- ENSIN
- EVANSELIS
- FAILIM
- FOTIN
- GAVANA
- GOAPIM
- HANDET
- HETMAN
- IKONOMI
- INDAI
- JENERETA
- JUNIA
- KAIKAIM
- KAIS
- LAIBRI
- LAULAU
- MALOLO
- NATING
- OLAPUKPUK

NEPASJEUUIZISOORPADE
 GFGYINDAIONRSOGLTNT
 ERAMMDRAESTILNXCISHH
 XFVHAGIGKOUIAEISAFIN
 MFAILIMAIACQNNSCIEHU
 INNMOKAIKAIMQFCRRHER
 VCAKLNNUOAHTEAOECLNF
 IALHORPCNNILGMTFETS
 PGOACKOEOPOSRAQRQCM
 ERELUTMNMELMQSIENC
 JIVPELITIESEQRFB
 GEADWSAJLNFGLBQBLML
 PLNHNSFUPROOCIFKXVZ
 OASETHBNTMTIOMSTILS
 HWETRLAIBRIGTPPAPISN
 RELMIEPANANDNSBEQORW
 EJIANATINGKEVRLFYVFJ
 MGSNLAAXJIESCRIPAMR
 SSGOAPIMQSIFTUVEVFTS
 EFHFESSNETQAAROVQEOI

Ansa bilong Wod Pilai isu 2124



WANTOK Ol bai ileksen i KOMENTRI mas kamap hariap

LONG dispela wik, ol pipel bilong Pomio i amamas bikos ol i gat wanpela memba bilong palamen nau. Bai ileksen i pinis na lektoral Komisnin i tokaut long nem bilong nupela memba, Elias Kapavore. Ritening opisa bilong dispela bai ileksen i tokaut long nem bilong em long Sande nait. Nupela memba i amamas na i promis long helpim ol pipel bilong Pomio ilektoret long Is Nu Briten. Longpela taim i no bin gat wanpela memba i lukautim ilektoret bihain long nesenel kot i bin kalabusim Paul Tiensten long Mas 24, 2014.

Dispela em i gutpela nius bilong ol lain Pomio. Na long dispela wik tu, Nesenel Kot i tokaut olsem i no moa memba bilong Ijivitari Ilektoret long Oro provins na i tok i mas gat wanpela bai ileksen i kamap hariap long makim nupela memba bilong ol pipel. Nesenel kot i painim olsem Arore i asua long yusim pasin i no bihainim lo. Wanpela kendidet bilong 2012 nesenel ileksen, John Warisan i bin kisim dispela petisen i go long kot. Long wankain taim tu, jas i harim dispela kot i tok ol polis opisa, ilektoret na poling opisa husat i bin stap insait long 2012 nesenel ileksen bilong

Ijivitari bai i no inap stap insait long nupela bai ileksen bilong ilektoret.

Em nau, opis bilong Ilektoral Komisnin i mas redi long kamapim wanpela moa bai ileksen long dispela yia. Ol wok redi i stat pinis long bai ileksen bilong Goilala na Sandaun rijonal sit. Bai ileksen bilong Goilala i kamap bikos memba bipo i bin dai na long Sandaun, kot i bin rausim memba na tokaut long bai ileksen i mas kamap.

I gat sampela moa ilektoret i stap nau we memba bilong ol i kamap long ai bilong kot pinis na wetim kot long tokaut long wanem kain mekim save ol i mas kisim. Na i gat tupela ilektoret ol siting memba i salensim disisen bilong kot long rausim ol, olsem na ilektoret Komisnin i no inap long mekim wanpela samting inap kot yet i skelim askim bilong ol dispela memba.

I tru olsem ol kot bilong salensim ol kendidet husat i win long nesenel ileksen i save winim sampela yia, tasol hia long PNG yumi amamas long lukim olsem jastis i wok strong yet na disisen bilong ol kot i soim klia dispela gutpela piksa. Han bilong lo i longpela, na kot bai i painimaut wanem samting i stret na wanem pasin i brukim lo na skelim gut ol toktok bipo long em i givim disisen bi-



Andrew Trawen, ilektoret Komisnin.

long en.

Kot bilong harim disput bilong ileksen i save winim planti mun olsem na long taim bilong givim disisen, jas i save tok long bai ileksen i mas kamap hariap. Na i gutpela tu sapos nesenel gavman i harim dispela tok na mekim isi long ilektoret Komisnin i statim wok bilong kamapim bai ileksen. Bikpela helpim nesenel gavman i mas mekim em long givim mani hariap long kamapim ol dispela bai ileksen. Sapos yumi kaunim ol mun nau, na bai yumi lukim olsem taim i sot nau bipo long 2017 nesenel ileksen i kamap. Olsem na wok i mas kamap hariap long ol bai ileksen.

WANTOK

Published Weekly, Thursday, for
Word Publishing Company, Ltd.
P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela yia, 52 niuspepa

Ples:

PNG

AUSTRALIA

ASIA PACIFIC na JAPAN

AMERICA na EUROPE

Air:

K220.00

US\$110.00

US\$150.00

US\$210.00

General Manager

Elizabeth Konga

Editor

Veronica Hatutasi

Published at
Able Building
Complex,
Sec 58 Lot 02,
Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



Word Publishing Company Limited

P. O. Box 1982, Boroko, NCD, PNG. Tel: (675) 325 2500 Fax: (675) 325 2579

Email: word@wantok.com.pg

Vacant Positions

Circulation Supervisor

Qualification:

A Diploma in Business Studies majoring in Management or Sales & Marketing.

Minimum of 3 years experience in similar job.

Main area of responsibility will be to develop Customer retail outlet base around PNG and Overseas on Subscription.

Well converse with Computer applications and production deadlines.

Have at least three years hands on experience in a distribution networking area.

Familiar with handling of Airline Cargos and shipment documentation.

Must be of sober habit and be prepared to work long hours.

Advertising Sales Representative

Qualification:

A Diploma in Business Studies majoring in Sales and Marketing

Sober habit and willing to learn and work in a team.

Experience preferred but not necessary.

Attractive packages are offered for both positions and will be made available to the right applicant.

Forward your CV no later than 29 May 2015 to:

Publisher of:



WANTOK

The General Manager,
Word Publishing Company Limited,
P.O.Box 1982, Boroko, NCD
Email: word@wantok.com.pg

Wantok
Today



TOK PISIN NEWS

from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

2015 Pasifik Gems long PNG bai nambawan tru

2015 Pasifik Gems long Papua New Guinea bai winim ol narapela Pasifik Gems blong bipo na ol pipal bilong PNG i ready gut long lukautim ol pipel blong rijon long dispela bikipela bung long mun bihain.

Dispela em toktok bilong Sif Esekutyutiv Opisa bilong Pot Mosbi Sermba bilong Komes na memba bilong Pasifik Gems Ogenaising Komiti, David Conn.

Mista Conn i autim dispela toktok wanpela mun stret pastaim long ol i opim Pasifik Gems long Pot Mosbi long namba 4 i go inap long namba 18 Julai.

Planti pipel iwok long wari olsem planti ples bilong pilai bai no nap pinis taim ol i statim Gems, na tu olsem bai gat wari long ol wok sekyuriti.

Tasol Mista Conn i tok em i bilip dispela Gems bai kamap gut tru.



Tupela musik manmeri atis bilong Australia, Paul Saulo na Fatai i pulim pablik long Australia Week wantaim singsing bilong ol. Foto: ABC

Dokta Mills autim hevi long rural helt long PNG

OL lain husat i go pas long sait long rural helt long Australia nau i save moa long hevi we i stap long rural helt long Papua New Guinea.

Dokta David Mills, Presiden blong PNG Society blong Rural na Remote Health i toktok

Dr David Mills, Presiden bilong PNG Society bilong Rural na Rimot Health i tok taim em i gimim toktok long Australian Nesenel Rural Helt Alaiens Konprens ol i holim long Darwin long dispela wik.

Em i tokim samting olsem 1000 long ol delegate long dispela bung olsem tok moa long haf long 7-million pipel blong PNG, i nog at wanpela dokta i stap long distrik bilong ol.

Dokta Mills i tok ol deleget long dispela conprens i serim ol infomesen we i ken helpim ol long ol rot long daunim ol hevi ol i gat long sot long ol dokta.

Dokta Mills husat i Medikel Suprintenden long Kompam Rural Hospital long Enga Provins i tok dispela kain bung i gutpela long wanem, ol i ken lainim long wanpela narapela long rot we wanwan kantri i bihainim long daunim ol hevi bilong helt long ol rural eria.

PNG i mas redi long El Nino: Sam Maiha i tok

BOS bilong Weda opis long Papua New Guinea Gavman i tok gavman i mas kirapim nau wanpela komiti bilong redim ol wok long helpim ol pipel na kantri long ol hevi em dispela kain taim o weda ol i kolim El Nino bai kamapim.

Sam Maiha em dairekta bilong PNG Nesenel Weda Sevis i tok olsem bihainim waning o tok lukaut olsem dispela El Nino bai hamarim kantri long 12 -pela mun i kam.

El Nino i wanplea kain taim we no gat ren i save pudaun na kamapim hevi long egrikalsa, planti sot long kaikai, na tu wara bai sot.

Mista Maiha i tok sampela provins long kantri nau i no lukim ren long sampela wik nau, na dispela bai go het long ol mun i kam.

Em i tok tu olsem PNG na ol narapela kantri long Melanesia olsem Solomon Ailans na Vanuatu bai bungim hevi tu long dispela El Nino taim.

Solomon Ailans i wanbel long rausim simuk lo

PLANTI pipel long Solomon Ailans i nau i stat long wanbel wantaim ol tambu na samting we i stap insait long Tobako Kontrol Ektloa bilong kantri.

Ol peket simuk long Solomon Ailans i nau karim ol waning saen

Dokta Geoff Kenilorea, Dairekta bilong Prevensen na Kontrol bilong ol Non-

Komyunikebol Disis long Solomon Ailans i tokaut long dispela taim kantri i makim Wol No Tobako De long Sande.

Namel long ol dispela tambu em long no ken simuk insait long ol pablik transpot, ol skul, haus sik, na ol opis - na ol waning piksa tu long ol peket bilong sigaret.

Dokta Kenilorea i tok ol i mas karimaut planti moa awenes long dispela lo long kontrolim simuk long kantri, tasol pipel i stat long wanbel long ol dispela lo.

Em i tok maski planti long pablik i sapotim dispela lo long kontrolim simuk, bikipela wari bilong ol atoriti nau em long hau long strongim dispela lo.

Dokta Kenilorea i tok planti pipel long pablik i laik tok ol i mas kotim ol husat i brukim dispela loa.

Australia Week long PNG i wok long go het

AUSTRALIA Week long Papua New Guinea i go het yet long dispela wik, wantaim planti kain kain samting we Hai Komissi bilong Australia i redim na go pas long en.

Aaron English em Pablik Diplomesi Opisa bilong Australia Hai Komisin long PNG i long wiken, ol i bin mekim sampela wok i karamapim spot olsem kriket bilong ol meri we ol i bin lon-sim Women's Empawamen Project long sait bilong kriket.

Ol i bin holim tu wanpela kriket pilai namel long ol

Australia Hai Komisin wok-meri na ol meri bilong ples Tubusereia. Australia Week lid atis, Fatai na Benson Saulo i bin stap tu insait long dispela program i bin kamap long ples Tubusereia ausait long Pot Mosbi.

Ol i bin holim wanpla trening tu bilong kukim kaikai na tu, ol i bin skulim ol pipel long ol gutpela we bilong kaikaim ol gutpela kaikai long helpim helt bilong ol.

Tude wanpela man bilong Australia, Benson Saulo husat i gat papa bilong Nu Ailan provins na mama bilong en i wanpela asples meri bilong Australia i stori long ol sumatin long Yunivesiti bilong PNG. Singa bilong Melbourne, Fatai i singsing wantaim ol atis bilong PNG long Australia Week.

Wanpela musik woksop i bin kamap long UPNG we i lukim singa bilong Melbourne, Fatai i bungim ol sumatin.

Narapela program em Tep Tok Dokumentri long Nesenel Musium na At Galeri we soim sait long tumbuna pasin bilong wokim tatu o makmak long skin.

Na long nait, i bin gat wanpela laip musik konset long Lamana Hotel.

Namel long ol aktiviti ol arapela program i kamap em long Kriket Wol Kap Legesi lons long Vabukori Viles; Maket kuk skul na toktok long sait long kaikai long Gerehu Maket; Tanim Graun filim long Paradais Sinema we i harim dibet long ol developmen salens long PNG; na

Reconciliation Week film long Caritas Teknikel Sekenderi Skul we i soim ol kalsa blong ol asples pipel long Australia.

Gold Ridge main i no makim yet wan- pela join ventja

WANPELA liklik maining kampani bilong Australia we i wokim mineral prospekting tu long PNG i wanpela long ol foren kampani we i laik wokim join ventja wantaim papagraun kampani long developim Gold Ridge gol main long Sentral Guadalcanal long Solomon Ailans.

Walton Naezon em Siaman bilong Gold Ridge Komyuniti Invesmen Limited i tok ol i wok long toktok wantaim 10 -pela foren kampani i soim intres long dispela main.

Mista Naezon i tok ol bai sainim join ventja agrimen bihain ol i glasim gut ol foren kampani iy.

Em i tok ol i ken kisim sampela kampani we i wok long sampela eria bilong maining, o wanpela bikipela kampani long em yet i wokim maining.

Wanpela long ol kampani we i soim intres long tekova long Gold Ridge main nau em Frontier Resources.

Dispela i wanpela liklik maining kampani bilong Australia we i mekim eksploresen wok tu long PNG, tasol em i no wokim

maining operesen bilong en yet.

Mista Naezon i tok GCIL i go het long lukluk long proposel bilong Frontier Resources wantaim ol arapela.

OI PNG NGO i laikim moa toktok long Klaimet Senis

SAMPELA NGO long Papua New Guinea i tokaut strong engensim rot we gavman i lait hariap tru wantaim dispela Klaimet Senis (Mitigation) Bil bilong kantri.

PNG Kairiku Hiri Forest long wanpela pas em i bin salim i go long Praim Minista Peter O'Neill, i tok ol i kirap no gut tru long rot we gavman i wok long kirapim dispela Bil we em i laik kamapim olsem loa.

Thomas Paka, Eksekutyutiv Dairekta bilong PNG Eco-Forestry Forum i tok planti samting insait long draf Climate Change Bill ia ino stret oa ino klia.

Em i tok, wanpela long ol em long sait long husat nau bai stap insait long Klaimet Senis bod aninit long dispela lo. Nau i no gat wanpela long Civil sosaiti o NGO i stap insait long en.

Mista Paka i tok i moabeta gavman i putim dispela Bil i go bek long ol pablik long toktok long en pastaim long ol i putim i go long Palamen olsem wanpela bil.

Yumi mas lukautim ol wara bilong yumi

Esther Bralyn Wani i raitim

WARA em i laip. Wara i gat bikpela wok long laip bilong yumi ol manmeri, ol animal, na ol plent o kaikai yumi save planim na ol plent we yumi save kisim win long en na stap laip. Tasol sapos yumi no helpim o sevim wara bilong yumi bai yumi kisim bagarap na yumi ken dai.

Wara i olgeta samting. Tasol, long Papua Niugini yumi gat planti klinpela wara na wara i save ran long ol bus, maunten na ol liklik han wara. Dispela i save mekim yumi ol Papua Niugini ting olsem yumi gat planti wara na sampela pipel i save westim wara. Sapos kain pasin bilong westim wara i go het bai yumi kamap olsem ol narapela kantri husat i sot long wara.

Insait long PNG, i gat sampela hap we ol pipel i save kisim taim long wara tu. Planti ol pipel long ples o rurel hap i save wokabaut i go long ol longwe hap stret long pulmapim klinpela wara bilong dring na kaikai. Sampela ol pipel i save stap long ol setelmen insait long ol siti i save kisim taim long wara. Na ol pipel i save stap long siti tu i save baim wara long bikpela mani tu long yusim wara. Dispela i soim olsem wara i bikpela samting long laip bilong yumi bikos sapos no gat wara bai yumi kisim taim na traिम long painim sampela kain kain rot long kisim klinpela wara.

Long PNG, risets i soim olsem 60 pesen bilong populesen i no save kisim o yusim seif na klinpela wara. Olsem 900 pikinini i save dai long pekpek wara i kamap taim ol i dring o yusim wara i no klin.

Long dispela, ol pipel i nidim wara. Wara i stap long namel bilong sastenebel developmen. Wara em wanpela risos tu we i save givim planti sevis long ol manmeri. Em i save daunim poveti o pasin bilong nogat mani na kaikai, em i save groim ikonomi na envairomen sastenebiliti. Long kaikai i go long enej i sekyuriti inap long humen na envairomen helt, wara i save kamapim gut sosel laip bilong ol bilien pipel.

Wok painim aut i soim olsem solwara i karamapim olsem 70 pesen bilong graun na olsem 98 pesen bilong solwara em wara tasol em i no gutpela long dring bikos long sol. Olsem 2 pesen bilong gutpela wara i stap long graun, tasol 1.6 pesen bilong gutpela wara long graun i lok na stap olsem ais long ais ples long Atik we man i no inap stap. Narapela 0.36 pesen i stap aninit long graun na olsem 0.036 pesen tasol i stap long ol raun wara na ol bikpela wara. Tasol, dispela em i liklik stret long olgeta wara i save stap.

Wara i liklik na populesen bilong ol pipel i go bikpela tru na dispela i soim olsem bai gat bikpela hevi sapos yumi no lukautim gut wara. Long wanem Yunaitet Jenerel Asembli long 1992 ol i lukim olsem mipela i mas lukautim gut na sevim wara bilong bihain taim long dispela taim bilong bung ol i bin selebretim namba wan Wol Wata De long 22 Mas long 1993.

PNG tu i stap insait long dispela na mipela i save selebretim Wol Wata De olsem ol narapela kantri long Mas 22. Long dispela yia, mipela i selebretim wantaim het tok "Wara na Sastenebel Developmen".

Dispela de i save mekim ol pipel i luksave long bikpela wok wara i gat na save mekim long laip bilong yumi. Em i save kamap long mekim ol tingting bilong ol pipel i op na bai ol i ken gat pasin bilong lukautim wara na yusim gut bai em i ken stap longpela taim.



PRESWATA PROJEK: Wara em i laip long man, ol animal na ol diwai na ol plen long dispela graun. Ol lain i lukim pres wata pis projek long Bom, Madang. *Poto: James Kila*



WARA PULAP: Bogenvil i gat planti wara stret, bikpela na liklik wantaim. Yu raunim Bogenvil long rot long not i go olsem long sentrel na saut, bai yu abrusim moa long 200 wara. Poto i soim ol niuslain i glasim na skelim wara i tait i stap na planti kar i sanap wet long narapela sait. *Poto: Veronica Hatutasi*



WATAFOL: Raunwara em watafol i pulumapim na ol i banisim gut long Tabubil. Pablik i save raun i go long hap long kisim gutpela malolo na lukim na pilim netja, na amamas. *Poto: Anna Solomon*



GUTPELA WARA: Naispela pres wara i ran i kam daun long bikpela maunten long Himalaya, long kantri Nepal, klostu long India. Ol asples lain i sanapim bus haus long banisim ples we wara i stat long en. *Poto: Intanet*



WARA BILONG DRING: Yangpela Budis monk bilong ples Luang-Prabang long kantri Laos i wok long pulumapim ol kontena wara i stap. *Poto: Intanet*



GUTPELA WARA, GUTPELA KAIKAI: Lukim naispela dis kaika i kamap bihain long kukim wantaim gutpela wara. *Poto: Intanet*

NGO lain yusim liklik lain long traime stopim PMIZ projek

WANPELA non gavman ogenaissen (NGO) long Madang i traime ol kain kain rot long stopim wanpela bikpela nesanel gavman projek long go het na yusim ol liklik lain husat i no papagraun tru long stopim Pasifik Marin Industrial Zon (PMIZ) long kamap.

Wanpela papagraun bilong Kananam viles, Rudolf Francis i tok olsem dispela NGO, Bismark Ramu Grup i save stap long Jais Aben klostu long Riwo viles na i save mekim kain kain toktok long stopim developmen long kamap long Madang provins.

Em i tok dispela grup long pastaim i kamapim planti toktok long stopim Ramu Nikel Projek, na nau dispela sem grup tasol i wokim wankain gen.

Francis i tok olsem BRG wantaim ol lain bilong en i kisim ol liklik lain tasol na kolim olsem olsem lain bilong Bel tok-ples na protes na givim petisen i go long Madang provinsal gavman las mun na tu petisen we Mema bilong Sumkar, Ken Fairweather i givim long flua bilong

Palamen.

Em i mekim toktok sapotim Mema bilong Madang na Minista bilong Petroleum, Nixon Duban husat i tokaut long Palamen las wik olsem PMIZ em projek bilong Nesanel Gavman na i mas go het.

Long Palamen, Mista Duban i tokaut olsem PMIZ projek i stap insait long Madang distrik na i no Sumkar distrik, we Mista Fairweather i memba, na em i no stret long MP bilong Sumkar long bringim petisen i go long Palamen.

Mista Duban i tok ol pipel bilong Madang i rejista pinis long ol lenona ambrela kampani long wok wantaim PMIZ projek na laikim dispela projek long go het.

Mista Duban i tokaut tu olsem Madang provins i kamap olsem pilai graun bilong ol NGO.

Em i tok ol dispela pipel husat i harim tok na sapotim ol NGO em ol liklik lain tasol husat i no gat graun insait long PMIZ eria na laik kamapim hevi tasol.

Mista Francis i tok dispela ol NGO lain i nogat gutpela developmen plen i stap long halivim ol pipel long senisim laipstail na kisim mani long helpim sindaun bilong ol. Ol NGO save toktok tasol long stopim ol gutpela developmen plen long kamap, tasol nogat rot long stretim laipstail bilong ol pipel bilong Madang.

Praim Minista, Peter O'Neill long las mun i tokaut olsem PMIZ projek bai go het bikos eria we developmen bai kamap em stet len, o graun we gavman i baim long RD

Tingim prais na groim moa kakao-Gaiyu

James G. Kila i raitim

OL RUREL fama long PNG husat i gat bikpela graun i stap nau i mas stat planim moa kakao bikos prais bilong kakao bai go antap.

Siaman bilong Basamuk Kakao Koporetiv Sosaiti, Tony Gaiyu i givim dispela salens long ol rurel kakao fama.

Gaiyu i mekim dispela toktok bihainim maus Sif Eksekutiv PNGCCIL, Dokta Eremas Tade, husat i bin tokaut olsem prais bilong kakao long kantri bai go antap.

Dokta Tade i bin tokaut dispela long lonsing seremoni long Basamuk we CCIL putim kamaut 10,000 kakao sidling neseri bilong ol kakao we sik nogut ol i kolim Kakao Pod Bora (CPB) i no inap long bagarapim ol. Dispela wok-bung i kamap aninit long pablik praivet patnasip (PPP) wok namel long Ramu NiCo na PNGCCIL.

Basamuk em wanpela long namba wan eria insait long PNG long kisim ol kakao sid we CPB i no inap long bagarapim ol, na ol dispela kakao sid em bai helpim stret ol kakao fama long Raikos distrik.

Long dispela taim tu i lukim Ramu NiCo wantaim PNGCCIL na ol lenona asossiesen bilong Ramu Projek i bin sainim wanpela memorandum ov agrimen (MOA) long wok bung wantaim insait long dispela PPP wok long strongim kakao prodaksen.

Dokta Tade i tok askim o dimand bilong kakao i wok long go antap long 3 % mak long olgeta yia, na dispela bai mekim saplai i pundaun long 2010. Olsem na sapos ol fama i planim kakao tude, ol bai gat sans long kisim gutpela mani taim prais bilong kakao i go antap long 2020.

Dokta Tade i tok fleiva o swit bilong PNG kakao em namba wan tru insait long wol, na moa long 90% lain long baim kakao i save laikim olsem na dimand o askim bilong kakao bilong PNG bai antap stret na dispela bai lukim prais bilong kakao tu i go antap long dispela taim long 2020.

Dokta Tade i tokim ol kakao fama long Raikos na ol famas long PNG long stat planim moa kakao nau, na insait long narapela 6-pela yia ol bai gat gutpela sans long kisim gutpela mani taim prais bilong kakao i go antap long 2020.

Em i tok tu olsem ol kakao famas long Madang na Raikos i gat gutpela sans long kisim helpim bikos ol i gat PNGCCIL opis i stap long Murunas we ol ken kisim ol kakao ekstensen edvais.

Em i tok tu olsem gavman i lusim planti mani long givim save long planti ol agrikalsa saintis long sait long kakao na ol arapela fud krops, na ol dispela saveman i kam long kantri long helpim ol famas long PNG long sait long prodaksen bilong kakao na ol arapela fud krops wok.

Dokta Tade i tok PNGCCIL, em wanpela agrikalsa ejensi bilong gavman husat i save mekim wok risets o wok-painimaut long sait bilong kakao na i save helpim tu ol fama long edvais long groim kakao na prodaksen bilong kakao insait long PNG.



Naispela haibrid kakao we wanpela fama long Madang i groim yusim haibrid klon



Word Publishing Company Limited

P. O. Box 1982, Boroko, NCD, PNG. Tel: (675) 325 2500 Fax: (675) 325 2579
Email: word@wantok.com.pg

NOTICE OF ANNUAL GENERAL BUSINESS MEETING

Notice is hereby given that the Annual General Business Meeting of Shareholders of Word Publishing Company Limited will be held at the company office, Top Floor, Section 58 Lot 02, Able Computing Building Complex, Waigani Drive, NCD, Papua New Guinea on Friday 5th June 2015, commencing at 9:00am.

ORDINARY BUSINESS

1. Financial Statements

To receive and consider the Financial Statements; and the reports of the Directors and Auditors for the period ended 31 December 2014.

2. Directors

Election of Directors:

Rev Sommy Setu retires by rotation in accordance with the Company's Constitution and being eligible, offers himself for re-election.

Fr Denny Guka retires by rotation in accordance with the Company's Constitution and being eligible, offers himself for re-election.

Fr Janusz Skotniczny, SVD retires by rotation in accordance with the Company's Constitution and being eligible, offers himself for re-election.

Following is the current list of directors and when their terms end:

Bishop Francesco Sarego, SVD term ends 2017

Rev Bernard Siai	term ends 2016	alternate, Mr Uvenama Rova
Fr Paul Liwun SVD	term ends 2016	
Rev Sommy Setu	term ends 2015	
Mr Lawrence Stephens	term ends 2017	
Fr Denny Guka	term ends 2015	alternate, Mr Amos Misirait
Fr Janusz Skotniczny, SVD	term ends 2015	
Fr Joseph Maciolek, SVD	term ends 2017	

3. Appointment of Auditors

Kapi & Clarke Chartered Accounts, the auditors for the past year, being eligible; offer themselves for re-appointment as auditors of the Company.

4. Any other business of which notice is given.

Dated this 21st Day of May 2015

By Order of the Board,

Elizabeth Konga,
Company Secretary.



Publisher of:

WANTOK

Today

Katolik Sios i sapotim Pasifik Gem

Katolik Sios (KS) i sapotim Pasifik Gem (PG) na i tok olsem dispela gem i ken kamap wantaim bel isi na pinis olsem tu.

Presiden bilong Konpres bilong ol Katolik Bisop bilong PNG na Solomon Ailans, Arnold Orowae i tok sios i lukim olsem spot em i wanpela bikipela samting insait long sosaiti bai helpim pisikol, helt na gutpela sindaun bilong ol pipel.

“Spot i save skulim ol yangpela lain long i gat gutpela tingting, na lus tingting long ol no gut pasin olsem vailens na kram,” Bisop Orowae i tok.

Spot i save bringim ol pipel i kam bung na em i save opim tingting bilong pipel long ol i ken kisim

gutpela tinging insait long kantri na long wol wantaim.

Bisop Orowae i tok moa olsem, spot i save kamapim gutpela pasin na skulim ol yangpela long disiplin na ol i ken kamap gutpela manmeri long bihain taim insait long komyuniti bilong ol, na long olgeta hap long wol.

“Long taim bilong pilai, i gat birua pasin i save kamap namel wantaim ol pilai o wantaim ol sapota bilong tupela tim husat i pilai na tu, long dispela kain taim, planti manmeri i save bung na raskol pasin na pik-poket i save kamap bikipela.

Long dispela as, yumi mas lukautim yumi yet long ol pasin i no stret,” Bisop i tok.

Baton i raun long long Milen Be

RAUN bilong Oil Search Pasifik Gems Rilei Baton long dispela wik i stap long Milen Be Provins bihain long lusim Oro provins em i bin stap long en long las wik.

Rilei tim i bin pundaun long Trobrien Ailan na rilei i bin stat long Kaibola Praimeri skul long Kiriwina Ailan we planti handet sumatin i putim ol tumbuna bilas na welkamim Baton.

Bihain long naispela kalakala welkam ol sumatin i givim, Baton i kalap long kanu na ol i kisim em i go long nupela jeti ol krus sip i save anka long en.

Pinis long hap, Baton rilei i ran

raunim ailan na i karamapim ol ples olsem Wol Wot u balus beis we nau, ol gaden i stap long en.

Long ples Omarakana, ol i givim Baton i go long Trobrien Ailan Paramaun o bikipela sif long holim na bihain, skruim wokabaut i go long ol narapela ples.

Ran i bin pinis long ples Sinaketa we komyuniti i bin soim ol wok bilong Kula Tred na kanu bipo ol i kisim Baton long Losuia long malolo long hap long nait.

Tim bai skruim wokabaut long ol ailan long Milen Be bipo em i lusim na go long narapela provins.

Baton i raun long bot long Alotau. Poto: MadNESS Photography



Sampela veniu na pilai pekes tiket i klostu pinis

GUTPELA nius olsem klostu olgeta tiket bilong lukim ol pilai long ol sampela veniu na ol spot pilai i klostu pinis.

Em long ol veniu olsem Caritas Teknikel Sekenderi skul we ol bai pilaim tebol tenis, bodibilding na boksing na long POM Raket Klap we ol bai pilaim raket.

Ol fan bilong ol dispela pilai i givim gutpela sapot long baim ol tiket na i luk olsem ol bai skruim gutpela sapot long taim bilong Gems.

Ol tiket bilong pilai suting i klostu

pinis tu. Planti piple long PNG i no ave tumas long dispela pilai, tasol long tiket seils we i klostu pinis i min olsem bihain taim bilong dispela spot i luk gutpela.

Sif Eksekutyutiv opisa bilong Gems Ogenaising Komiti, Peter Steward i autim bikipela tok tenkyu i go long pablik husat i baim ol Gems tiket na tok mani bilong ol i no wes nating na ol bai amamas long lukim ol pilai long taim Pasifik Gems i stat long Julai 4.

Em i strongim tu ol narapela husat i no baim ol tiket yet long go het na baim.

Ol sumatin long Caritas bai karim Medol

GEMS Ogenaising Komiti (GOC) i makim 98 meri sumatin long Caritas Teknikel Sekenderi Skul long Nesenel Kapitol Distrik (NCD) long karim medol long ol Gems Medol Seremoni long XV Pasifik Gems long mun Julai.

Olsem ol Medol Bera, ol sumatin bai givim 2, 250 medol long ol bikipela manmeri o VIP long givim long ol etlit.

Ol i skelim ol sumatin long 12-pela grup na bai ol i stap long ol kain kain kompetisen veniu long karimaut wok bilong ol.

Wan wan tim bai i gat wanpela tim lida, supavaisa, ol medol bera, ol bilum bera, ol eskot, ol masel na ol lain bilong apim fleg. Dispela tim bai luksave olsem olgeta medol wina i mas gat gutpela ekspiriens taim ol i kisim medol.

Rodela Demo husat i makim GOC i tok, “Caritas Teknikel Sekenderi Skul i patna wantaim Gems

Ogenaising Komiti long hosim 3-pela spots na tu bai givim olgeta medol na bilum bera long ol medol seremoni.

Wan wan sumatin long Caritas husat GOC i makim ol bai werim ol tredisinel bilum i makim wanpela bilong ol 22 provins long dispela ekspiriens.

Long wankain taim, bai 8-pela Caritas meri stap insait long tim bai go kisim ol etlit na ol opisal husat bai kam long Gems.

Ol bai welkamim ol wantaim stail bilong Papua Niugini wantaim ples sing sing, danis na givim ol tredisinel nekles.

Long redim ol sumatin long wok bilong ol, Medol Seremoni tim i mekim wanpela orientesen bilong ol long Caritas skul las wik Fonde. Dispela bai helpim ol long save long ol wok bilong ol.

Ol bai statim namba wan wok bilong ol long namba wan medol seremoni bilong Gems long 5 Julai, 2015.

Ol Caritas sumatin husat bai karim medol long orientesen



**BAIM
BAIM
BAIM
BAIM**

Lae	↔	Buka	K 449
Lae	↔	Kimbe	K 279
Lae	↔	Kavieng	K 369
Lae	↔	Madang	K 239
Lae	↔	Rabaul	K 339
Lae	↔	Wewak	K 349
Madang	↔	Wewak	K 229
Port Moresby	↔	Daru	K 299
Port Moresby	↔	Goroka	K 299
Port Moresby	↔	Alotau	K 279
Port Moresby	↔	Mt. Hagen	K 299
Port Moresby	↔	Lae	K 249
Port Moresby	↔	Losuia	K 399
Port Moresby	↔	Popondetta	K 219
Port Moresby	↔	Rabaul	K 379
Port Moresby	↔	Wewak	K 349
Rabaul	↔	Buka	K 249
Rabaul	↔	Kimbe	K 239
Rabaul	↔	Kavieng	K 229

ALOTAU	- Preston White Street	641 1288
ARAWA	- Pilonava Building Town Centre	7915 0391
BUKA	- Tsiirin Motors Building	7377 1220
GOROKA	- Airport	532 2532
KAVIENG	- Airport	7100 0742
KIMBE	- Megamart Building	983 5511
KIUNGA	- Airport	649 1125
KOKOPO	- Old ANZ Building	7177 6157
LAE	- Micro Bank Haus, Fifth Street	479 5980
MADANG	- Global Travel	422 0011
MT. HAGEN	- Central Highlands Printers	542 0662
	- Kagamuga Airport	542 2732
POPONDETTA	- Girda Undari Motors Premises	7996 9904
PORT MORESBY	- Level 1, Pacific Place	321 3400
	- Vision City	7373 4250
RABAU	- Rabaul Hotel	982 1999
TABUBIL	- Airport	649 9171

Baim tiket em wan wei tasol na yu ken ron long balus namel long Monde 25 Mei na Fonde 25 Jun 2015. Yu ken bukim sit namel long Fraide 22 Mei na Fonde 4 Jun 2015. Rul bilong baim tiket em istap na ino gat planti sit.

**Ringim 7222151
or go lukluk long
www.apng.com**



Ramu NiCo tasol i no rausim ol wokman bilong en



OI DWU Bisnis Menesmen sumatin long fran bilong Ramu NiCo Bes long Madang



HR Deputim GM, John Rosser givim toktok



Mista Rosser i givim gutpela toktok long ol DWU sumatin

PRAIS bilong metal i pundaun na dispela i mekim planti ol bikpela maining kampani long wol i daunim kos bilong prodaksen, na sampela i rausim ol wokman bilong ol.

Wankain hevi i kamap long PNG, we i lukim sampela bikpela maining kampani katim kos bilong prodaksen na i rausim ol wokman bilong ol.

Tasol long dispela taim i kam, wanpela kampani we i no bin rausim ol wokman bilong en em Ramu NiCo Menesmen (MCC) Limited.

Dispela em wanpela bikpela infomesen em ol sumatin bilong Divine Word University i bin kisim las wik taim ol i mekim lukluk raun i go long Ramu NiCo (MCC) operesen bes long Madang taun.

Moa long 40 sumatin husat i stadi long Bisnis Menesmen i bin gat sans long harim ol toktok we i stori long wol metal prais nau em planti bikpela kampani long wol husat i wok long maining na petroleum i wok long bungim.

Ol dispela sumatin bilong DWU i bin go long Madang Operesen Bes kisim infomesen long sait long menesmen na wanem wok bisnis na maket Ramu NiCo i save bihainim.

Pablik Rilesins seksen bilong Kopret Opis Dipatmen bilong Ramu NiCo i bin welkam long ol dispela DWU sumatin na givim ol infomesen na soim ol wok kampani i save wok. Ol prisentesen bilong Ramu NiCo las wik Fraide i stat wantaim video so, we ol sumatin i lukim na harim ol

stori bilong kamap bilong dispela namba wan nikel/kobalt projek long PNG.

Vidio i tok klia tu long stat bilong projek long konstraksen taim i go inap long prodaksen taim na i stori long rot we Kampani i save kisim graun antap long Kurumbukari Main long Usino Bundi distrik na stretim long benefisiesari plent na salim long 135 kilomita paiplain bilong en i go daun long Basamuk Rifaineri Plent we dispela graun i save go long ol prosesing stes na ol i save redim na salim i go ovasis olsem miks haidroxaid produk (MHP).

Deputi Jeneral Menesa bilong Human Risoses Dipatmen, John Rosser i givim planti gutpela toktok long sait long wol maket prais na tu hevi nau em planti ol intanesenel maining na petroleum kampani i wok long bungim long taim nau we prais i daunbilo.

Mista Rosser i tokaut olsem Ramu NiCo tu i bungim bikpela salens bikos nikel prais long wok maket i daunbilo. Olsem na Kampani i putim kamap long mekim Projek i go het gut long dispela taim nogut we nikel prais long wol maket i wok long stap daunbilo tru.

Ol DWU sumatin i kisim gutpela infomesen tu olsem long4 2015 nikel prais i stap olsem US\$15, 110 long wanpela tan na kobalt i sanap olsem K\$31,500 long wanpela tan inap long mun Epril taim prais bilong tupela i go daun. Long mun Epril prais i go daun olsem US\$13,510 long wanpela tain na kobalt i go daun olsem US\$ long

wanpela tan long ripot i kam long London Metal Ekesens.

Ol sumatin i kisim gutpela infomesen tu long wanpela ripot bilong CRU Monita, we i save glasim nikel prais long 2012 we i soim olsem prais bilong nikel long long 2012 i bin stap namel long US\$17,000 na US\$18,000 mak, na ol prais we i go antap kam daun long dispela taim i bihain ol maikro iekonomik nius.

Ramu NiCo PR na HR i toksave long ol sumatin olsem wok-mak Ramu NiCo i putim long wok bihain em long kos kontrol, kwaliti kontrol na gutpela na strongpela menesmen sistem. Long sait long bringim ap prodaksen mak, KBK na Basamuk Rifaineri i kisim bikpela toktok long menesmen olsem ol i mas bringim ap mak bilong prodaksen i go 85 pesen na 90 pesen stat long mun Me na rausim ol samting i laik blokim o stopim ron bilong wok.

Ol arapela dipatmen we i sapatim KBK Main wok i kisim strongpela toktok long wokim wok we i ken bringim moa nikel na kobalt i go daun long Basamuk Rifaineri na bihainim na strongim ol wok masin long hap.

Long sait long kontrolim kos, Kampani i laikim olgeta wokman meri long wok-bung long daunim ol operesen kos i go daun olsem 5 na 8-pesen. Ol eria we dispela wok long daunim kos mas kamap em long sait long Prodaksen long daunim kos bilong Saplai i kam insait, daunim mak bilong moni i go aut na bringim kamap kos seavings long olgeta dipatmen.



Ramu NiCo Management (MCC) Ltd,
the manager of Ramu NiCo Project is proud to host the 5th
NATIONAL MINING EMERGENCY RESPONSE CHALLENGE
in Madang

Date: August 22-25, 2015
Venue: DWU & PNG Maritime College



An initiative of:
National Apex Mining Safety Council



Under the auspices of:
Mineral Resources Authority



Canterbury Bulldogs i winim Canberra Raiders long wanpela strongpela NRL pilai we Josh Reynolds i hiro.

JOSH Reynolds we New South Wales i bin dampim em long stap insait long Stet ov Orijin tim i bin kamap hiro bilong ol Canterbury long Sande taim ol i winim Canberra 41-34 long wanpela gutpela NRL pilai stret.

Apinun long pilai taim bilong Reynolds i bin bisi tru taim em i skorim tupela trai. Ol i bin putim em long ripot, tasol pastaim, em i bin kikim fil gol long namba 80 minit long brukim wankain sko bilong tupela sait i lok long, 34 poin na lukim olsem Canterbury i ronawe wantaim ol poin bihain long em i go pas 26-0 long namba wan haf.

Ol Not Kwinslen Cowboy i winim ol West Tigers, 8-0 long Campbelltown we i lukim namba 8 win long gem bilong dispela sisen.

North Queensland i wokim klap rekot taim em i winim 8-pela gem bilong em. Long las pilai, ol i winim West Tigers wantaim 8-0 sko taim ol i bin pilai long Campbelltown.



Ol nupela pilaia bilong New South Wales em Josh Jackson na David Klemmer bai strongim tim long Stet ov Origin pilai, Ryan Hoffman i tok.



ragbi
nius

Blatter i winim sia bilong FIFA presiden

wol spot
nius

SEPP Blatter i gat 79 krismas husat i winim vot long Fraide long kamap presiden bilong FIFA long 5-pela yia. Long wankain taim, ol US Dipatmen bilong Jastis i givim sas long 9-pela futbol opisal bilong em wantaim korapsen pasin.

Ol biklain long US i tok, 9-pela opisal na 5-pela spot midia na promosen eksekutiv em ol i sasim ol long kisim \$US150 milien insait long 24 yia.

Spot Minista bilong Briten, John Whittingdale, i tok, het bilong futbol gavaning bodi, Sepp Blatter, i mas lusim sia bilong larim Wol Kap i ken pilai yet.

Minista Whittingdale i laikim Blatter long risain long posisen bilong em long wanem, ol opisal bilong FIFA i yusim krangi o paulim mani.

Blatter yet i no mekim wanpel rong tasol ol opisal i no givim rispek long em olsem presiden.

Tupela beng long Briten i karimaut rivyu long painim wanem rot dispela mani i bin go aut long en.

Wanpela man I makim maus man bilong wanpela beng long London i tok, ol i lukim pinis ol pe ol i wokim tasol ol bai no inap tokaut long dispela.

Sampela moa beng lain i tok olsem ol narapela beng long Briten na Britain's Barclays, i join na wok



bung wantaim ol man i gat pawa, tasol HSBC beng long Briten na Barclays i no bin mekim wanpela tok-tok.

Sunday Time Niuspepa bilong Briten i ripot olsem Swiss prosekyuta bai askim Blatter long wanem ol i lukluk long ol korap pasin bilong em na ol opisal.

Wanpela mausman bilong atoni-jeneral long Switzerland i tok olsem ol bai no inap askim presiden bilong FIFA long dispela kain taim, tasol ol bai askim em bihain sapos ol i nid lo askim.

Contador i winim Giro resis

ALBERTO Contador i strongim sait bilong em olsem em i wanpela strongpela tuo raida taim wanpela man Spain i kam namba tu long raid resis.

Contador i lus long 2010 to na 2011 giro tasol nau em bai traim long kamap namba wan raida long wanem, leit Marco Pantani i winim tuo na giro wantaim long yia 1998.

Contador i tokim ol ripota olsem em i pilim nupela kain samting, taim em i pinisim mak bilong giro.

Contador i tok long lusim giro long narapela taim long wanem, em i go insait long bikpela pen tru, taim em i pinis.

Resis bilong tuo bai hat no gut tru, olsem na planti ol man ol i no resis long giro, na ol i lukluk long bikpela stes resis bilong wol.

Long maunten stes, Astana, husat em i resis wantaim Contador, i go longwe long em tasol long stes 16, em i painim out sampela mekenikol birua na Contador i winim dispela resis.

Tude, Contador i kisim malalo liklik long bihain em bai resis wantaim long Rut-du Sud long June 18 i go pinis long 21 na tu long Tuo de Frens em bai stat long Utrecht long Netalen long Julai 4.



Tsonga bai pilai long kwata-fainel

JO Wilfried Tsonga em i wanpela man long kantri Frans husat i winim Tomas Berdych na ol i peim em long em bai go insait long Frans Open kwata fainel.

Taim tupela i pilai, bikpela ren i bagarapim tupela na tupela i weit liklik. Long wankain taim, Roger Federer, husat em i sempion bilong ol man long 2009 na em i pilaia tu na i weit long ren i stop.

Berdych i no amamas long pilai gen, long wanem, ren i bagarapim gem. Tasol taim bilong tupela long pilai i kamap, Tsonga i winim 5-pela gem olgeta long lain.

Em i namba tri taim we Tsonga i win na ol i peim em long em bai pilai kota-painol wantaim Kei Nishikori, husat em i man long Japan.

Ol man long Frens i amamas nogut tru long Tsonga i win.

Nishikori em i namba wan man bilong ol Japan long go insait long Frens Open kota-painol na em i nogat wanpela tingting long stop long dispela kain taim, long wanem Japan i no bin go insait long kota-painol long 80 yia na moa.



Hunters i redi long namba 2 tim long kompetisen

PNG Hunters i redi long bung ol Ipswich Jets long matmat long Kokopo long dispela wiken. Ipswich Jet i stap long namba tu ples long leda na Hunters i stap long namba 5.

PNG Hunters i kisim malolo long las wiken na ol pilaia i bin go na malolo wantaim ol famili bilong ol long wan wan provins bilong ol. Planti bilong ol pilaia tu i go bungim ol wan pilaia bilong ol long Digicel Kap ragbi resis na pilai long tim bilong ol.

Hunters i gat gutpela rekot wantaim ol Ipswich Jet we ol bin winim ol long namba wan sisen na ol Jets kam bek na bekim long winim ol Hunter. Tupela tim wantaim i gat wan wan win namel long tupela.

Long dispela wiken bai tupela i traim long abrusim dispela rekot long go pas long win bilong tupela.

Jets bai pilai strong long daunim Hunters long wanem Hunters i bin daunim namba wan lida bilong leda, Blackhawks.

PNG Hunters i kisim sampela pilai kam insait long skwat bilong long dispela wiken pilai na dispela bai lukim sapos ol i fit long trening taim ol kisim pilai graun long dispela wiken.

Hunters tim i no gat planti bagarap long ol pilaia bilong ol, na kosa Michael Marun bai makim gut ol pilaia long daun dispela namba tu tim long leda bilong Kwinslen Kap. Sapos Hunter i winim ol bai planti bai surik liklik long Hunters long wanem ol daunim namba wan na namba tu tim long leda. Lainap bilong dispela wiken bai lukim;

- 1 Stargroth Amean
 - 2 Bland Abavu
 - 3 Thompson Teteh
 - 4 Noel Zeming
 - 5 Adex Wera
 - 6 Israel Eliab
 - 7 Ase Boas
 - 8 Henry Wan
 - 9 Wartovo Puara
 - 10 Esau Siune
 - 11 Kato Ottio
 - 12 Lawrence Tu'u
 - 13 Adam Korave
 - 14 Brandy Peter
 - 15 Sebastian Pandia
 - 16 Willie Minoga
 - 17 Enoch Maki
 - 18 David Lapua
 - 19 Timothy Lomai
 - 20 Edward Goma.
- Kosa Michael Marum.



Ol Hit man bilong Hunters bai mekim bikpela pilai long dispela wiken

Young Tigers tim kisim helpim

OL Young Tigers Ragbi tim bilong ples Siviri long Kerema, Galp provins nau i ken pilai long ragbi lig resis bihain long kisim helpim long peim affliesen fi bilong ol.

Dairekta bilong Dawarh Kontraktas, Murphy Sefa, long dispela wik i bin givim K500 kesmani i go long Gabriel Ikamu (rait) em Presiden bilong Young Tigers Ragbi Klap na tu, Kaunsela bilog Wod 7, Kerema Eben LLG.

Dispela yangpela bisnis man i sevim ol tim long ples stret bilong em long peim K500 membasip fi bilong ol.

Wanpela samting tu we Mista Sefa i laik lukim em long helpim ol yut long go insait long pilai spot na lusim ol pasin bilong dring na kisim ol spak brus. Kerema taun kompetisen i gat 8-pela tim na ol i statim ol pilai resis pinis.

Poto na stori: Buana Regel



Bmobile - Vodafone i sapotim Tim PNG

Philemon Tame i raitim

WANPELA bikpela samting insait long olgeta indastri em i komyunikesen, na long Tim PNG em i moa bikpela samting.

Dispela em bikos dispela komyunikesen wantaim Bmobile-Vodafone i bungim 700 na moa pipel insait long TPNG.

Bmobile-Vodafone i mekim isi long TPNG i kam long mak g em i redi long pilai nau, long wanem Bmobile-Vodafone i helpim TPNG wantaim 200 sim kad, 50 mobail pon na 6-pela midia ped long TPNG bai yusim long taim bilong gem.

TPNG Sef de Misin, Richard Kasman, i tok olsem bikpela tim olsem TPNG bai nidim komyunikesen namel wantaim jeneral tim menesmen na wantaim ol narapela tim menesa na kos long gutpela ogenaisesen wok.

"Tim bai win sapos em i ogenaisim gut tim bilong

em na taim em i gat gutpela komyunikesen insait long tim," Kassman i tok.

Kassman i tok moa olsem, "Bmobile-Vodafone em i namba wan komyunikesen indastri insait long kantri na em i gat luksave long dispela kain nid em TPNG i tok bikpela tenkyu."

Sundar Ramamurthy, Grup CEO bmobile-vodafone skruim toktok na i tok olsem, "mipela i givim sevis long Pasifik Gem na tu, mipela i helpim Gems Ogenaising Komiti na ol narapela tim long wok bung wantaim na ol bai kam long arere bilong dispela gem wantaim no gat birua pasin."

Mipela bai win taim TPNG i winim dispela gem, na bmobile-vodafone i lukluk long givim bikpela koneksen wantaim mobail long taim bilong gem.

Ramamurthy i tok, olgeta samting bilong bmobile em TPNG menesmen bai yusim long taim bilong gem, bilong tim komynikesen, ol midia apdet, awenes na tim operesen.



Sif Maketing Opisa bilong bmobile-Vodafone, Mista Parag Panjwani i sanap long han kais na Tim PNG Sef de Misin, Mr. Richard Kassman (red shirt). Poto: Andrew Molen

Amaiyu kamap Petron bilong PRL

MEMBA bilong Mosbi Not Is na Vais Minista bilong spots i kamap Petron bilong Pot Mosbi Ragbi Lig. Labi Amaiyu i no nupela long Pot Mosbi Ragbi Lig, em bin stap olsem wanpela bod memba bipo long em kamap memba bilong palamen.

Amaiyu i tingting long strongim ragbi lig insait long siti na dispela petron wok bilong em bai strong ragbi lig insait long siti.

Pot Mosbi Ragbi Lig i gat ol nupela memba long bod we ol bin karim aut wok long strongim ragbi

insait long siti maski ol i nogat pilai graun long kamapim gem.

PRL nau i kisim helpim kamap long ol Ami long Murray Bareks long yusim pilai graun bilong ol long dispela yia.

No gat keten resa long Sir John Guise Stedium

Nicky Bernard i raitim

SIR JOHN Guise Stedium bai holim wanpela Hunters gem long raun 14 bilong Kwinslen Kap. Dispela gem bai kamap long June 15 2015.

Dispela tok bilong traim Sir John Guise Stedium i kamap long Spot Minista Justin Tkatchenko na Gavana bilong NCD Powes Parkop.

Minista Tkatchenko i tok dispela pilai em bilong traim graun na ples bilong sindaun na lukim pilai long lukim sapos em orait long kisim opening seremoni bilong Pasfik Gems na ol pilai we bai kamap long hap.

Dispela pilai bai Hunters i bungim South Logan Magpies we tupela tim wantaim i wanbel long traim dispela nupela pilai graun long stedium.

Bai i no gat narapela gem bai pilai long hap bipo long Hunters na Magpies olsem ketenresa, bai tupela tim tasol bai pilai long hap.

Bai gat Digicel Kap resis tu bai kamap long dispela deit tasol ol bai pilai long Murray Bareks olsem resis bilong ol yet.



POM bai holim tupela Digicel Kap resis

i kam long bekses

Long dro bilong Digicel Kap long dispela wiken i tok olsem Vipers bai go long Kokopo long kisim Gurias, long wanem Gurias i flai long las wiken go antap long Goroka long kisim ol Lahanis we Guria bin lus long Lahanis. Na Isapea bai go long Goroka long bungim Lahanis.

Tasol dispela dro i senis liklik long wanem Murray Bareks pilai graun nau i ken kisim Digicel Kap resis na tu givim sans long Vipers na Isapea long pilai long hom taun bilong ol long ai bilong ol sapota bilong ol.

Pot Mosbi Vipers i no winim wanpela pilai bilong ol liklik long taim sisen i kik ov na dispela wiken i mas win pilai bilong ol bipo long fainol bai stat.

Gurias, Tigers na Lahanis i go pas long pul bilong ol na tupela tim bilong Mosbi i bosim poin leta long daunbilo.



- 1 Tiger Milali bilong tim Sol i makim ero bilong em long dat bod. Planti ol yangpela manmeri i wok long pilai dat long NCD kompetisen nau.
- 2 Pilaia bilong Sisters i ran wantaim bal taim pilaia bilong Bataflai i ranim em long Pot Mosbi Ragbi Lig resis.
- 3 AON pilaia i painim sapot long ol pilaia bilong em long Kopret tas resis long Murray Bareks pilai graun.
- 4 Adam Korave bilong Stop N Shop Vipers i ran wantaim bal taim pilai bilong Lae Tigers i traिम long holim em. Tigers i win 16-14.
- 5 Dispela bal boi i holim Digicel bal long taim bilong pilai namel long Vipers na Tigers. Planti pilaia i no holim gut dispela bal taim ol pilai long bikipela san long Mosbi. Dispela bal i wok long wel long han bilong ol pilai.
- 6 Adam Korave, David Loko na Sebastin Pandia i pasim tok bihain long pilai bilong ol. Loko na Pandia i stap insait long Hunters tim long las yia, tupela i traिम hat long go insait gen long dispela yia.



IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA

Tuna



Emi tuna
bilong PNG

PROUDLY
PNG
MADE

Manufactured by



RD Tuna Canners Ltd.

Moa mit na
oil insait



TUNA IN OIL

POM bai holim tupela Digicel Kap resis

Nicky Bernard i raitim

MURRAY Bareks pilai graun bai lukautim tupela Digicel Kap ragbi resis long dispela wiken namel long Pot Mosbi Vipers na Agmark Gurias na Gulf Isapea wantaim Goroka Lahanis.

Murray Bareks pilai graun i bin lukautim pinis tupela pilai bilong Digicel Kap. Long las wiken, em i bin lukautim Vipers na Tigers na sampela wiken i go pinis em i lukautim tupela Mosbi tim, Isapea na Vipers.

Pot Mosbi Ragbi Lig i wok long wetim yet pilai graun bilong ol we bikipela wok i kamap long en long senis i kamap wanpela bikipela Intanesenel pilai graun. Dispela i mekim ol bod bilong PRL i toktok wantaim ol bikman bilong Ami long yusim pilai graun bilong ol long kamap olsem hom graun bilong PRL inap long wok pinis bilong nupela PRL.

Tupela Digicel Kap long Murray Bareks i bin kamap gut tru we no gat hevi i bin kamap, na planti sapota bin amamas long lukim ol tim bilong ol pilai gut tru.

...lukim moa long pes 30





PMV

DIESEL
OIL



**BOROKO
MOTORS**

PORT MORESBY	☎ 325 5255
LAE	☎ 472 1144
MT HAGEN	☎ 542 1933
TABUBIL	☎ 649 9048
KIMBE	☎ 983 5035
MADANG	☎ 422 2659
KOKOPO	☎ 982 8193
GOROKA	☎ 532 3552

Email: info@borokomotors.com.pg
Website: www.borokomotors.com.pg

PMV OIL BILONG YUMI